

一、地理沿革

(一) 政区建置

(东汉)班固《汉书》卷六《武帝纪第六》:

(元鼎六年冬十月)遂定越地,以为南海、苍梧、鬱林、合浦、交阯、九真、日南、珠厓、儋耳郡。

(东汉)班固《汉书》卷二十八下《志第八地理下》:

合浦郡,武帝元鼎六年开。莽曰桓合。属交州。户万五千三百九十八,口七万八千九百八十。县五:徐闻,高凉,合浦,有关。莽曰桓亭。临允,牢水北入高要入郁,过郡三,行五百三十里。莽曰大允。朱卢。都尉治。

(西晋)陈寿撰(南朝宋)裴松之注《三国志》卷四十七《吴书二》:

(黄武七年春三月)改合浦为珠官郡。

(南朝宋)范晔《后汉书》卷一百一十三《志第二十三郡国五》:

合浦郡武帝置。雒阳南九千一百九十一里。五城,户二万三千一百二十一,口八万六千六百一十七。合浦徐闻《交州记》曰:出大吴公皮以冠鼓。高凉建安二十五年孙权立高凉郡。临元 朱崖

(南朝梁)沈约《宋书》卷三十八《志第二十八州郡四》:

高凉太守,二汉有高凉县,属合浦,汉献帝建安二十三年,吴分立,治思平县,不知何时徙。吴又立高熙郡,太康中省併高凉。宋世又经立,寻省。永初郡国高凉又有石门、广化、长度、宋康四县。何、徐並無宋康,当是宋初所立,元嘉二十年以前省,其余当是江左所立。领县七。户一千四百二十九,口八千一百二十三。去州水一千一百,去京都水六千六百。……

宁浦太守,晋太康地志,武帝太康七年改合浦属国都尉立。广州记,汉献帝建安二十三年,吴分鬱林立,治平山县。吴录,孙休永安三年,分合浦立为合浦北部尉,领平山、兴道、宁浦三县。又云晋分平山为始定,宁浦为润阳,未详孰是。永初郡国有安广县,无始定县。何、徐並無此郡。领县六。润阳令,晋武帝太康七年立。永初郡国作简阳。兴道令,晋武帝太康元年,以合浦北部营之连道立。吴录有此县,未详。……

合浦太守,汉武帝立,孙权黄武七年,更名珠官,孙亮复旧。先属交州。领县七。户九百三十八,去京都水一萬八百。合浦令,汉旧县。徐闻令,故属朱崖。晋平吴,省朱崖,属合浦。朱官长,吴立,朱作珠。荡昌长,晋武分合浦立。……

（南朝梁）蕭子顯《南齊書》卷十四《志第六州郡上》：

越州，鎮臨漳郡，本合浦北界也。夷獠叢居，隱伏巖障，寇盜不賓，略無編戶。宋泰始中，西江督護陳紹獵北地，見二青牛驚走入草，使人逐之不得，乃誌其處，云“此地當有奇祥”。啟立為越州。七年始置百梁、隴蘇、永寧、安昌、富昌、南流六郡，割廣、交、朱、戴三郡屬。元徽二年，以伯紹為刺史，始立州鎮，穿山為城門，威服俚獠，土有瘴氣殺人。漢世交州刺史每暑月輒避處高，今交土調和，越瘴獨甚。刺史常事戎馬，唯以戰伐為務。……

合浦郡 徐聞 合浦 朱盧 新安 晉始 蕩昌 朱豐 宋豐 宋廣

（北魏）酈道元《水經注》卷三十六《溫水注》：

合浦郡，治合浦縣，漢武帝元鼎六年平越所置也。

（北魏）酈道元《水經注》卷三十六：

王氏交廣春秋曰：朱崖、儋耳二郡，與交州俱開，皆漢武帝所置。大海中，南極之外，對合浦徐縣。

（北魏）酈道元《水經注》卷三十七：

蒼泠縣，漢武帝元鼎六年開，都尉治。《交州外域記》曰：越王令二使者典主交趾、九真二郡民。後漢遣伏波將軍路博德討越王。路將軍到合浦，越王令二使者，齎牛百頭，酒千鍾及二郡民戶口簿，詣路將軍。乃拜二使者為交趾、九真太守，諸雒將主民如故。……

浪水東別逕番禺。《山海經》謂之貴禺者也。交州治中合浦姚文式問云：何以名為番禺？答曰：南海郡昔治在今州城中，與番禺縣連接。今入城東南偏，有水坑陵，城倚其上，聞此縣人名之為番山。縣名番禺，儻謂番山之禺也。《漢書》所謂浮牂柯，下離津，同會番禺，蓋乘斯水而入越也。……

高帝定天下，使陸賈就立佗為南越王，剖符通使。至武帝元鼎五年，遣伏波將軍路博德等攻南越，王五世九十二歲而亡。以其地為南海、蒼梧、鬱林、合浦、交趾、九真、日南也。

（唐）房玄齡等《晉書》卷十五《志第五地理下》：

漢初，以嶺南三郡及長沙、豫章封吳芮為長沙王。十一年，以南武侯織為南海王，陸賈使還，拜趙他為南越王，割長沙之南三郡以封之。武帝元鼎六年，討平呂嘉，以其地為南海、蒼梧、鬱林、合浦、日南、九真、交趾七郡，蓋秦時三郡之地。元封中，又置儋耳、珠崖二郡，置交趾刺史以督之。昭帝元始五年，罷儋耳并珠崖。元帝初元三年，又罷珠崖郡。後漢馬援平定交部，始調立城郭置井邑。順帝永和九年，交趾太守周敞求立為州，朝議不許，即拜敞為交趾刺史。桓帝分立高興郡，靈帝改曰高涼。建安八年，張津為刺史，士燮為交趾太守，共表立為州，乃拜津為交州牧。十五年移居番禺。詔以邊州使持節，郡

給鼓吹，以重城鎮，加以九錫六佾之舞。吳黃武五年，割南海、蒼梧、鬱林三郡立廣州，交阯、日南、九真、合浦四郡為交州。戴良為刺史。值亂不得入，呂岱擊平之，復還并交部。赤烏五年，復置珠崖郡。永安七年，復以前三郡立廣州。及孫皓，又立新昌、武平、九德三郡。蜀以李恢為建寧太守，遙領交州刺史。晉平蜀，以蜀建寧太守霍弋遙領交州，得便宜選用長吏。平吳後，省珠崖入合浦。交州統郡七，縣五十三，戶二萬五千六百。合浦郡漢置。統縣六，戶二千。合浦南平蕩昌徐聞質珠官

（唐）魏征《隋書》卷三十一《志第二十六地理下》：

合浦郡舊置越州。大業初改為祿州，尋改為合州。統縣十一，戶二萬八千六百九十。

合浦舊置合浦郡。平陳，郡廢。大業初置郡。南昌北流大業初廢陸川縣入。封山大業初廢廉昌縣人。定川舊立定川郡。平陳，郡廢。龍蘇舊置龍蘇郡。平陳，郡廢。大業初又并大廉縣入。海康梁大通中，割番州合浦立高州，尋又分立合州。大同末，以合肥為合州，此置南合州。平陳，以此為合州，置海康縣。大業初州廢，又廢摸落、羅阿、雷川三縣入。抱成舊曰抱，并置郡。平陳，郡廢。十八年改曰抱成。隋康舊曰齊康，置齊康郡。平陳，郡廢，縣改名焉。扇沙舊有椹縣，開皇十八年改為椹川，大業初廢入。鐵杷開皇十年置。

（唐）李吉甫《元和郡縣志》卷三十八《嶺南道五》：

如和縣，中下。東北至州九十里。本漢合浦縣之地。武德五年析欽州南賓、安京二縣地置如和縣，因縣西南四十里如和山為名，屬欽州，景雲二年割屬邕州。

（唐）李吉甫《元和郡縣志》卷三十八《嶺南道五》：

橫州，寧浦。下。開元戶一千三百七十八。鄉十七。

古越地，趙佗王越地，亦屬之。漢平南越，置合浦郡。今州即漢合浦郡之高涼縣地也。在今高州界，晉于合浦北部置寧浦郡。隋開皇十年廢為縣，以屬簡州。十八年改簡州為緣州。大業三年廢州入鬱林郡。隋末陷賊，武德四年平蕭銑重置南簡州。貞觀八年改為橫州。至德移于舊州東七里鬱江北岸。

（唐）李吉甫《元和郡縣志》卷三十八《嶺南道五》：

欽州，寧越。下。開元戶二千二百八十。鄉十二。

古越地，非九州之域。尉佗王越，地亦屬焉。漢平南越，置合浦郡。今州即合浦郡之合浦縣地也。按合浦在廉州界，宋分合浦置宋壽郡。梁武帝于今欽江縣南三里置安州，隋開皇十八年改安州為欽州，取欽江為名也。大業三年改為寧越郡。武德四年平蕭銑，改為州，仍為都督府，貞觀元年罷都督府，復為州。……

管縣五：欽江，安京，遵化，內亭，靈山。

欽江縣，下。郭下。本漢合浦縣之地，宋于此置宋壽郡。隋開皇十九年罷郡為欽江縣，屬欽州。皇朝因之。……

遵化縣，下。西南至州二百八十里。隋開皇二十年置，本合浦縣地也。欽江水，源出縣東北闡博山。

內亭縣，下。東南至州一百里。本漢合浦縣地，隋開皇十七年置，名新化縣。十八年改名內亭，屬欽州。皇朝因之。因內亭水為名。

（唐）李吉甫《元和郡縣志》卷三十八《岭南道五》：

潯州，潯江。下。開元戶一千七百一十六。鄉五。本漢合浦郡地，貞觀七年分置潯州，取北潯江為名。十二年廢入冀州。長壽元年又割冀州桂平、皇化、大賓三縣重置潯州。

（唐）李吉甫《元和郡縣志》卷三十八《岭南道五》：

交州，古越地也。秦始皇平百越，以為桂林、象郡，今州即秦象郡地也。趙佗王南越，地又屬焉。元鼎六年平呂嘉，遂定越地，以為南海、蒼梧、鬱林、合浦、交趾、九真、日南、珠崖、儋耳九郡，元封五年置刺史以部之，名曰交趾者，交以南諸夷，其足大趾廣，兩足並立則交焉。漢本定為交趾刺史，不稱州，以別于十二州。建安八年，張津為刺史，士燮為太守，共表請立為州，自此始稱交州焉。吳黃武五年，分交趾、日南、九真、合浦四郡為交州，南海、鬱林、蒼梧三郡為廣州。尋省廣州，還併交州，以番禺為交州理所，後又徙于交趾。晉太康中，徙理龍編。隋開皇十年，罷交趾郡為玉州。仁壽四年，置總管府。大業三年罷州，復為交趾郡。武德四年又改為交州總管府。永徽二年改為安南都護府。至德二年改為鎮南都護府，兼置節度。大歷三年罷節度置經略使，仍改鎮南為安南都護府。貞元六年又加招討處置使。

（唐）杜佑《通典》卷一百七十一《州郡一》：

分合浦之北為廣，治番禺。又增置郡國二十有三，凡州百五十有六，縣千一百有九，以為冠帶之國，盡秦漢之土。及永嘉南渡，境宇殊狹，九州之地有其二焉。

（唐）杜佑《通典》卷一百八十四《州郡十四》：

秦始皇略定揚越，謫戍五方，南守五嶺，後遣任囂攻取陸梁之地，遂平南越，置郡，此為南海、桂林、象，置南海尉以典之，所謂東南一尉者也。秦末，趙佗遂王其地，漢因封之。佗後數代，其相呂嘉反，武帝使伏波將軍路博德討平之。元封初，又遣軍自合浦徐聞入南海，至大洲，方千里，略得之。後兼置交趾刺史。其餘土宇，自漢以後，歷代開拓。後漢建武中，交趾女子徵側、妹徵貳反，於是九真、日南、合浦蠻俚皆應之，自立為交趾帝。使馬援平定交部，始調立城郭，置井邑。至獻帝，乃立為交州。

（唐）杜佑《通典》卷一百八十四《州郡十四》：

恩州，秦屬南海郡，二漢為合浦郡地。……

春州，秦屬南海郡，二漢屬合浦郡地。……

高州，秦以前土地與晉康郡同，二漢屬合浦郡。……

新州，秦屬南海郡，二漢屬合浦郡。……

勤州，秦屬南海郡，二漢屬合浦郡。……

象州，秦屬桂林郡，二漢屬鬱林郡地，吳又分置桂林郡，晉宋齊皆因之。隋平陳置象州，因象山為名。煬帝廢入始安郡。大唐復置象州，或為象郡。領縣三，武化、陽壽、武仙。……

橫州，秦桂林郡，二漢鬱林、合浦二郡地。……

招義郡，東至當郡吳川縣大海一百四十里。南至海康郡二百五十里。西至合浦郡二百五十里。……

羅州，秦屬象郡，二漢屬合浦郡地。……

潘州，秦屬象郡，二漢屬合浦郡。……

容州，秦屬象郡，二漢屬合浦郡，隋為合浦永平二郡地。……

辯州，秦屬象郡，二漢屬合浦郡。……

牢州，秦屬象郡地，二漢屬日南郡。吳省。晉平吳復置。宋分置南流郡，齊梁曰定川郡，隋屬合浦郡。……

廉州，秦象郡地，漢置合浦郡，後漢同吳。改為珠官。晉又為合浦郡，宋因之，兼置臨瘴郡及越州。齊又因之。煬帝改為祿州，尋改為合州，又廢州置合浦郡。大唐置廉州，或為合浦郡。領縣四：合浦、封山、蔡龍、大廉并漢合浦縣。……

巖州，土地與合浦郡同。……

雷州，秦象郡地，二漢以後並屬合浦郡地。梁分置合州，大同末，以合肥為合州，以此為南合州。隋平陳，又為合州。煬帝初州廢，以屬合浦郡。

（唐）杜佑《通典》卷一百八十八《邊防四南蠻下》：

秦始皇平天下，開嶺外，置南海、今南海、始興、義寧、海豐、恩平、南陵、臨賀、高要、感義、晉康、臨封、開陽、高涼、連城、新興、銅陵、懷德、潮陽等郡地皆是。桂林、今始安、平樂、蒙山、開江、蒼梧、潯江、臨江、郁林、平琴、安城、賀水、常林、象郡、龍城、融水、朗寧、懷澤、寧仁、寧浦、橫山、脩德、龍池、永定等郡地皆是。象郡。今招義、南潘、普寧、陵水、南昌、定川、寧越、安南、武峨、龍水、忻城、九真、福祿、文陽、日南、承化、玉山、合浦、安樂、海康、溫水、湯泉等郡皆是。

（唐）歐陽詢《藝文類聚》卷八十四《寶玉部下》：

謝承《後漢書》曰：孟嘗為合浦太守，郡境舊採珠，以易米食。先時二千石貪穢，使民採珠，積以自入。珠忽徙去，合浦無珠，餓死者盈路。孟嘗行化，一年之間，去珠復還。又曰：汝南李敬為趙相，奴於鼠穴中得繫珠，瑠珞相連，以問主簿。對曰：前相夫人，昔亡三珠，疑子婦竊之，因即去婦，敬乃送珠付前相，相慙。追去婦還。

(后晋)刘昫《旧唐书》卷四十一《志第二十一地理四》:

漢武帝命伏波將軍路博德、樓船將軍兵踰嶺南，滅之。其地立九郡，曰南海、蒼梧、鬱林、合浦、交趾、九真、日南、儋耳、珠崖。後漢廢珠崖、儋耳入合浦郡。……

新興，漢臨允縣，屬合浦郡。晉置新寧郡，梁置新州。……

恩平，州（恩州）所治。漢合浦郡也，隋置海安縣。武德五年，改為齊安。至德二年九月，改為恩平也。……

陽春，州（春州）所治。漢高涼縣地，屬合浦郡，至隋不改也。……

良德，漢合浦縣地，屬合浦郡。吳置高涼郡，宋、齊不改。……

銅陵，漢臨允縣地，屬合浦郡。宋立瀧潭縣。隋改為銅陵，以界內有銅山也。……

從化，漢高涼縣地，屬合浦郡。武德四年，分寧浦置淳風縣。貞觀元年，改為從化也。……

石城，州（羅州）所治。漢合浦郡地。宋將檀道濟於陵羅江口築石城，因置羅州，屬高涼郡。唐復置羅州於縣。……

茂名，州（潘州）所治。古西歐、駱越地，秦屬桂林郡，漢為合浦郡之地。……

北流，州（容州）所治。漢合浦縣地，隋置北流縣。……

博白，州（白州）所治。漢浦縣地，屬合浦郡。武德五年，析合浦縣置博白縣也。……

欽江，州（欽州）所治。漢合浦縣地。……

靈山，已上縣，並漢合浦縣也。……

大廉，武德五年置。四縣皆漢合浦縣地。……

雷州下，隋合浦郡之海康縣。

(北宋)李昉等奉勅撰《太平御覽》卷一百七十二《州郡部十八》:

恩州《十道志》曰：恩州，恩平郡。秦屬南海郡，二漢為合浦郡，唐貞觀中置恩州。

春州《十道志》曰：春州，南陵郡。古越地，秦屬南海、象郡，漢合浦郡之高涼縣地，晉分置恩平縣。唐武德四年討平蕭銑，置春州。……

高州《十道志》曰：高州，高涼郡。秦以前土地與晉康郡同，二漢屬合浦郡。吳置高涼郡，晉因之，梁置高州，隋平陳，郡廢而高州如故。唐為高州。《南越志》曰：高涼，本合浦縣也。吳建安十六年，衡毅、錢博拒步騭於高安峽，毅投水死，博與其屬亡于高涼。呂岱為刺史，博既請降，制以博為高涼都尉，於是置郡焉。……

新州《十道志》曰：新州，新興郡。古越地，秦始皇略取陸梁地，置象郡，今州即其地也。漢為合浦縣之臨元縣。晉穆永和七年，分蒼梧郡，於此置新寧郡。梁、隋、唐為新州。

勤州《十道志》曰：勤州，銅陵郡。秦屬南海郡，二漢屬合浦郡，隋屬信安郡，唐置勤州，或為銅陵郡。……

橫州《十道志》曰橫州，寧浦郡。古越地，秦象郡地，漢為合浦郡之高涼縣地。隋於此置簡州，又改為綠州，唐改為橫州。……

潘州《十道志》曰：潘州，南潘郡。古歐駱越地，秦平百越，為桂林郡地。漢為合浦縣地，屬合浦郡。唐武德四年置南宕州，八年改為潘州。《岭表记》曰：潘州，昔有方士潘茂於此昇仙，遂以名郡。

容州《方輿志》曰：容州，普寧郡。古越地，秦屬象郡，二漢屬合浦郡。宋太始七年分合浦縣，於此立南流郡。齊、梁、陳不改，隋廢。唐武德四年置銅州。貞觀八年改為容州，因容山為名。“

辯州《十道志》曰：辯州，陵水郡。古越地，秦象郡地，二漢屬合浦郡，唐置辯州。……

白州《十道志》曰：白州，南昌郡。古越地，秦象郡地，漢為合浦郡。唐武德四年置南州，六年改為白州。……

廉州《方輿志》曰：廉州，合浦郡。秦象郡地，漢置合浦郡，後漢同。吳改為珠官。晉又為合浦郡，宋因之，兼置臨瘴郡及越州，齊又因之，隋改為祿州，尋又改為合州，唐置廉州。《後漢書》曰：孟嘗，字伯周，會稽上虞人，屬合浦太守。先時太守多貪珠，遂徙向交趾。嘗到，革理前弊，珠遂還，稱為神明，桓帝征之。

巖州《方輿志》曰：巖州，安樂郡。土地與合浦郡同，唐為巖州，或為安樂郡。

雷州《方輿志》曰：雷州，海康郡。秦象郡地，二漢以後並屬合浦郡。梁分置合州，大同末為南合州。隋煬帝初廢，唐為雷州。

（北宋）乐史《太平寰宇记》卷一百五十八《岭南道二》：

恩州，恩平郡，今理恩平縣。《禹貢》揚州之分。春秋時，百越地也，秦屬南海郡，漢置為高涼縣，屬交州合浦郡。梁大通中為高州。隋置高涼郡，武德四年平蕭銑，置高洲都督府，管高、春、羅、辯、雷、崖、儋、新八州；七年，割崖、雷、儋、新屬廣州。貞觀二十三年廢高州都督府，置恩州。天寶元年改為恩平郡。乾元元年復為恩州。州內有清海軍，管戍兵三千人。按《投荒錄》云：恩州為恩平郡，涉海最為蒸濕。當海南五郡泛海路，凡自廣至勤、春、高、潘等七州，舊置傳舍。此路自廣州泛海行數日方登陸，前所謂行人憚海波，不由傳舍，故多由新州陸去，今此路惟健步出使與遞符牒者經過耳。既當中五州之要路，由是頗有廣陵、會稽賈人船循海東南而至，故吳越所產之物，不乏于斯。

（北宋）乐史《太平寰宇記》卷一百五十八《岭南道二》：

春州，南陵郡，今理陽春縣。古越地。秦取百越為南海、象郡。漢為合浦郡之高涼縣地。晉分置恩平縣。隋為高涼郡之陽春縣。唐武德四年平蕭銑，置春州。天寶元年改為南陵郡。乾元元年復為春州。

（北宋）乐史《太平寰宇記》卷一百五十八《岭南道二》：

陽春縣，三鄉。州所理，漢高涼縣地，屬合浦郡。至隋不改。

（北宋）乐史《太平寰宇記》卷一百五十八《岭南道二》：

銅陵縣，東南六十里。二鄉。本漢臨允縣地，屬合浦郡。宋立龍潭縣。隋改為銅陵縣，以界內有銅山。銅山。昔越王趙佗于此山鑄銅。廢勤州，本銅陵郡，理銅陵縣。二漢屬合浦郡之高涼縣地，唐武德四年置勤州，隸南康總管；九年改隸廣州，其年廢，縣屬春州。尋復置勤州，以銅陵來屬，仍析置富林縣。廢富林縣，在廢州北九十里。析銅陵縣置。

（北宋）乐史《太平寰宇記》卷一百五十八《嶺南道二》：

陽江縣，原十鄉，今三鄉。隋置縣，因邑界陽江為名，州舊治恩平縣。唐大順二年經兵寇，移州理此。陽江，自春州陽春縣流來。廢恩平縣，東一百五十里。舊九鄉。漢合浦郡地，隋置海安縣。唐武德五年改為齊安縣，至德二年改為恩平，去海五十里，舊為州理。廢杜陵縣，西北一百二十里。舊六鄉。隋杜原縣。唐武德五年改為杜陵，去海三十里。已上二縣，皇朝開寶六年廢入陽江。

（北宋）乐史《太平寰宇記》卷一百六十一《岭南道五》：

高州，高涼郡，今理電白縣。秦以前土地與康郡同。二漢屬合浦郡。吳置高涼郡，又立高興郡。晉亦如之，其后悉併於高涼。齊亦為高涼郡，兼置高州。隋平陳郡，廢而州存。煬帝初州廢，屬高涼、永熙二郡地。唐武德初復置高州。貞觀二十三年，分西平、杜陵，置恩州、高州，移治良德縣。天寶元年，改為良涼郡。乾元元年，復為高州。

（北宋）乐史《太平寰宇記》卷一百六十一《岭南道五》：

電白縣，元四鄉，今三鄉。梁置電白郡，隋改為縣、廢良德縣，在舊州西北三十七里。漢合浦縣地，屬合浦郡。吳置高涼郡，宋、齊不改。

（北宋）乐史《太平寰宇記》卷一百六十一《岭南道五》：

茂名縣，西南八十五里，舊五鄉，今三鄉。古西甌駱越地。秦屬桂林郡。漢為合浦郡地。隋置定州縣。唐武德四年平嶺表，於縣置南巖州，后改為潘州，仍改為茂名縣，以道士潘茂姓名為縣也。梁開平元年，改為越裳縣。後唐同光初復舊。皇朝開寶五年，廢潘州，以本州南巴、潘水二縣併入茂名，割屬高州。廢潘州，本南潘，郡治茂名縣，秦屬象郡。二漢屬合浦郡。唐武德四年，置南巖州，領南昌、定川、陸川、恩城、溫水、巖州六縣治。南昌縣，貞觀六年移理定川。八年改為潘州，仍廢恩城縣。天寶元年改為南潘縣。乾元元年復為潘州。按《嶺表記》，潘州因道士潘茂昇仙，遂以姓名為郡縣之稱。潘山，在縣東三十里，其山昔有道士潘茂，於此鍊丹昇仙，乃以為山名。

（北宋）乐史《太平寰宇記》卷一百六十三《岭南道七》：

新興縣，舊十二鄉，今四鄉。漢臨允縣，屬合浦郡。晉置新寧郡。梁置新州。

（北宋）乐史《太平寰宇記》卷一百六十五《嶺南道九》：

南流縣，東南九十里。舊三鄉，今四鄉。唐武德四年析容州北流縣置，屬容州。貞觀十一年改智州為牢州，以縣來屬。皇朝徙于定州水口為理。廢牢州，本定州郡，理南流縣。秦為象郡地。二漢屬日南郡。吳省。晉平吳復置。宋分置南流郡。齊梁為定州郡。隋屬合浦郡，唐武德二年于今夷州義全縣置義州，五年改為智州。貞觀十二年改為牢州，以牢石為名。天寶元年改為定川郡。乾元元年復為牢州。本蜀郡徼外蠻夷地，漢牂牁郡地。……

武化縣，東六十里。舊四鄉，今二鄉。漢潭中縣地，屬鬱林郡。隋置建陵縣，屬桂州。唐武德四年析建陵置武化縣，屬晏州。貞觀十二年廢晏州來屬，仍自武德縣移象州于縣置。非秦之象郡，秦之象郡，今之合浦縣也。大曆十一年移州歸壽樂宜舊城。

（北宋）乐史《太平寰宇記》卷一百六十六《嶺南道十》：

橫州，寧浦郡。今理寧浦縣。古越地。秦象郡地。漢為合浦郡之高涼縣地。高涼縣，今在高涼州界。《吳錄》云：吳以合浦北郡為寧浦郡。《廣州記》云：吳分鬱林郡置。隋開皇十年廢寧浦、簡陽二郡，仍于此置簡州。十六年又改簡州為緣州。煬帝初廢，以地屬鬱林郡之寧浦縣。唐武德四年置簡州，領寧浦、樂山、蒙澤、淳風、嶺山五縣。六年，改為南簡州。貞觀八年，改為橫州，以橫槎為名。天寶元年改為寧浦郡。乾元元年改為橫州。

（北宋）乐史《太平寰宇記》卷一百六十七《嶺南道十一》：

廢禺州，本温水郡，理峩石縣。故越地。婺女之分野。秦屬象郡地，隋合浦郡之定川縣。唐武德四年置南巖州，領南昌、定川、陸川、思誠、温水、巖川六縣，治南昌縣。貞觀六年移治定川，八年改為潘州，仍廢思誠縣。總章元年改為東峩州，移治峩石縣，二年改為禺州，以番禺地為名。其州有三梁鳥潁之民。天寶元年改為温水郡，乾元元年復為禺州。

（北宋）乐史《太平寰宇記》卷一百六十七《嶺南道十一》：

博白縣舊一鄉，今四鄉，州所理。唐武德四年析合浦縣地，置博白縣，以博白江為名。博白山，在邑界。廢建寧縣，在縣西，唐武德四年析合浦縣置。貞觀十二年省淳良縣入。

（北宋）乐史《太平寰宇記》卷一百六十七《嶺南道十一》：

欽州寧越郡，今理靈山縣，本合浦縣地，隋寧越郡。唐武德四年平蕭銑，改為欽州總管府，管一州，領欽江、安京、南賓、遵化、內亭五縣；五年置如和縣；其年置玉州、南亭州，並隸欽府，以內亭、遵化二縣屬亭州。貞觀元年罷都督府；二年廢玉州，以安海、海平二縣并廢亭州，以內亭、遵化並來屬；十年省海平縣。天寶元年改為寧越郡。乾元元年復為欽州。

（北宋）乐史《太平寰宇記》卷一百六十七《嶺南道十一》：

容州，普寧郡，今理北流縣。古越地。秦屬象州。二漢屬合浦郡。宋泰始七年，分合浦縣，于此立南流郡。有陳紹伯僭稱王，尋平，復為郡。歷齊、梁、陳不改。隋廢郡，又

為合浦、永平二縣地。唐武德四年平蕭銑，于今州東北置銅州，領北流、豪石、巖昌、渭龍、南流、陵城、普寧、新安八縣。貞觀八年改為容州，以州西容川為名。十一年省新安。開元中升為都督府。天寶元年改為普寧郡。乾元元年復為容州都督府，仍舊置防禦經畧招討等使，以刺史領之，兼充經畧軍使。

（北宋）乐史《太平寰宇記》卷一百六十七《岭南道十一》：

北流縣，舊六鄉，今二鄉，州所理。漢合浦縣地。隋置北流縣，在廉州界。

（北宋）乐史《太平寰宇記》卷一百六十七《岭南道十一》：

化州，陵水郡，今理石龍縣。古越地，秦屬象郡。漢合浦郡之高涼縣地。隋高涼郡之石龍縣。唐武德五年置羅州。六年移羅州于城石，于舊所置南石州，領石龍、陵羅、龍化、羅辯、慈廉、羅肥六縣。貞觀九年改南石州為辯州，省慈廉、羅肥二縣。天寶元年改為陸水郡。乾元元年復為辯州。州在陵、羅二水之間，皇朝太平興國五年改為化州，廢陵羅、龍化、羅辯三縣，但領石龍一縣，併割到廢羅州之石城、廉江、幹水、零綠四縣為吳川一縣，入當州，與石龍共二縣，煎鹽納本州，其廢縣三：江、幹水、零綠人戶煎鹽輸廉州。

（北宋）乐史《太平寰宇記》卷一百六十七《岭南道十一》：

石龍縣，二鄉，今四鄉。州所理。漢高涼縣，地屬合浦郡。唐武德五年屬羅州，六年改為辯州。

廢羅州，在縣西北一百一十里，本招義郡，理石城縣。秦屬象州。二漢屬合浦郡。宋元嘉三年，鎮南將軍檀道濟巡撫于陵羅江口築造此城，因置羅州，如江為名，屬高涼郡。齊、梁、陳因之。隋平陳。郡廢而羅州如故。煬帝初州廢，其地屬高涼郡。唐武德五年于石龍縣地復置羅州，領石龍、吳川、陵羅、龍化、羅辯、南河、石城、招義、零綠、慈廉、羅肥等十一縣。六年移羅州于石城縣之舊所，置南石州，割石龍、陵羅、龍化、羅辯、慈廉、羅肥，屬南石州。天寶元年改義郡。乾元元年復為羅州。

（北宋）乐史《太平寰宇記》卷一百六十七《岭南道十一》：

白州，南昌郡。今理博白縣。古越地，秦畧取陸梁地，置象郡，今州即此地也。漢為合浦縣地。唐武德四年平蕭銑，于此置南州，領博白、郎平、周羅、龍豪、淳良、建寧六縣，改為白州。貞觀十二年省郎平、淳良二縣。天寶元年改為南昌郡。乾元元年復為白州。

（北宋）乐史《太平寰宇記》卷一百六十七《岭南道十一》：

靈山縣，舊二鄉。漢合浦縣地，舊在州北六十六里，今為州所理。

（北宋）乐史《太平寰宇記》卷一百六十七《岭南道十一》：

保京縣，西南七十里，舊二鄉。漢合浦縣地。隋至安京縣。唐至德二年改為保京縣。羅浮山，在安京縣北十里，俗云形勢似循州博羅浮山，因以為名。武郎江，經邑界。

（北宋）乐史《太平寰宇記》卷一百六十七《岭南道十一》：

廢欽江縣，舊有州所理。漢合浦縣地。宋分置宋壽郡及宋壽縣。隋改為欽州，仍改宋

壽為欽江。

（北宋）乐史《太平寰宇訪》卷一百六十七《嶺南道十一》：

廢遵化縣，隋縣，屬南亭州。唐貞觀元年州廢，來屬。武牙山，在邑界。廢內亭縣，隋縣，因水為名。唐武德五年于縣置南亭州。貞觀元年州廢，來屬。靈伏山，在邑界。已上三縣，唐廢入靈山縣。廢安海縣，漢羸僂縣地。廢南賓縣，漢合浦縣地，已上二縣，皆唐時廢。

（北宋）乐史《太平寰宇記》卷一百六十七《嶺南道十一》：

廢石城縣，本合浦郡地。宋將檀道濟于陵羅江口築石城，因置羅州，屬高涼郡。梁陳復置羅州，隋廢州，入高涼郡，唐復置羅州于縣。

（北宋）乐史《太平寰宇記》卷一百六十七《嶺南道十一》：

北流縣，舊六鄉，今二鄉。州所理。漢合浦縣地。隋置北流縣，在廉州界。

（北宋）乐史《太平寰宇記》卷一百六十九《嶺南道十三》：

石廉縣，二鄉。本屬常樂州。廢廉州，在軍北四十里，本秦象郡地。漢為合浦郡，元鼎六年置九郡，即其一也。后漢因之。吳名名珠官。晉又為合浦郡。宋因之，兼置臨瘴郡，以界內瘴江為名。及越州領郡三，理于此。時西江都督護陳伯紹請置州，遂以為刺史，始立州鎮，穿山為城門，威服蠻獠。按《郡國志》云：伯紹平夷，至合浦，見三青牛，圍之不獲，即於其處置城，俗號青牛城。齊因之，隋煬帝初改為祿州，尋廢州，又置合浦郡。唐武德五年置越州，領合浦、安昌、高城、大廉、大都五縣。貞觀六年置珠池縣，其年割大都屬白州，八年改越州為廉州，十年廢姜州，以封山、東羅、蔡龍三縣來屬。十二年，廢安昌、珠池二縣入合浦，廢高城入蔡龍。天寶元年改為合浦郡。乾元元年復為廉州。廢合浦縣，在舊州郭下。漢縣，屬合浦郡，大海，在州西南一百六十里。有珠母海，郡人採珠之所，古之合浦也。州界有瘴江，名為合浦江。廢封山縣，在舊州西北一百二十里。隋廢。唐武德五年置姜州，領封山、東羅、蔡龍三縣。貞觀十年廢州，以縣入廉州。廢蔡龍縣，在舊州北一百五十里，唐武德中置。廢大廉縣，在舊州東南一百里，唐武德五年置。已上四縣，皆漢合浦縣地，並廢入石廉縣。姜山，思鄉水，性山，下溪水，已上皆廢廉州之山水。陳王祠。南中有妖鬼，號曰陳王神，面黑眼白，形容醜陋，祈禱有驗，人多惡之。陳霸先刻木作影，自敬事之神，與之叙族，尊為叔父，祭胙精潔，動靜與神俱。每有施為，多就擲琰，不得好卦，即云王叔不許，頗以感人。其旁有墓，及受梁禪，尊神為帝。糟頭山，尉佗駐軍處，人舂穀，積糟成山。山若鳴，則風颺立至。殞山，即宋陳伯紹殞妻處。蘇磨嶠。《南越志》云：寧浦郡東南有蘇磨嶠。麻嶺。屈璆《道里記》云：沙麻嶺，在寧浦郡南，郡即嶺之北垠也。合浦水，一名馬渡，昔有野馬渡此，因名之。銅舟湖。馬援鑄銅船五隻，一留北湖中，四隻將過海征林邑。珠母海，大海在縣西南一百六十里。珠母之海去縣八十里，採珠之所，即合浦也。凡珠璫出於蚌，蚌母廣數寸，長尺餘。后漢孟常，

會稽上虞人，為合浦守。先時守宰多貪，珠遂徙向交趾界。嘗到，革易前弊，珠復還，稱為神明。桓帝徵還，吏人攀車請留。常入船，夜遁。圍州。《交州記》云：合浦十八里有圍州，周圍一百里，其地產珠。

（北宋）乐史《太平寰宇記》卷一百六十九《岭南道十三》：

雷州，海康郡，今理海康縣。秦象郡地，漢合浦郡之徐聞縣地。梁分置合州，大同末以合肥為合州，以此為南合州。隋平陳，又為合州。煬帝初州廢，以縣屬合浦郡。唐武德四年蕭銑，置南合州，領海康、隋康、鉄杷、椹川四縣。貞觀元年改為東合州，二年改隋康為徐聞縣。八年，改東合州為雷州。天寶元年，改為海康郡。乾元元年復為雷州。按《投荒錄》云：雷之南濱大海，郡蓋以多雷為名。以其雷聲近在簷宇之上。雷州之北，高州之南數郡，亦多雷聲，似在尋常之外。俗于雷時具酒饋奠焉，法甚嚴謹，有以羸肉雜置食者，霹靂即至。

（北宋）乐史《太平寰宇記》卷一百六十九《岭南道十三》：

海康縣，五鄉。秦象郡地，漢徐聞縣地，屬合浦郡。梁分置南合州，隋廢州置海康縣。朱梁開平三年，曾移州于驚雷江源。至劉氏偽命日，却歸海康。廢遂溪縣，在州北九十里。舊齊鉄杷、椹川二縣，后廢，改為遂溪縣。皇朝開寶元年并為新福縣。廢徐聞縣，在州南二百四十里。漢縣名，隋置隋康縣。唐貞觀二年改為徐聞。《漢志》云：自合浦、徐聞南入海，畧以為儋耳、珠崖郡。即此縣。

（北宋）乐史《太平寰宇記》卷一百七十《岭南道十四》

元鼎六年定越，以為南海、蒼梧、鬱林、合浦、交趾、九真、日南、珠崖、儋耳九郡。元豐五年置交州刺史以部之，不稱州者，蓋別為十二州也。按交趾之稱，今南方夷人，其足大指開廣，若並足而立，其指相交。後漢因之，兼置交州領郡，理於此。又《吳志》：呂岱為交州刺史，到州，高涼賊帥錢博乞降，岱因承制。以博為高涼西部都尉。多送金銀贖其罪。又鬱林夷賊攻圍郡縣，岱討破之。時杜陽、浚陽、中宿、屬湘州始興郡也。臨賀、荔浦、馮乘、謝沐諸城賊王金、黃肅、梅伊、梅常、陳尤等尋復蜂起，陸掠州郡，權又詔令岱討之。岱自討金，將軍曹枉、翟陽討尤，遂生縛金等斬之，獲萬餘人。後岱遷安南將軍，假節，加鼓吹，封都鄉侯。黃武五年，吳王以交趾懸遠，乃分為兩州，割合浦以北海東四郡廣州，呂岱為刺史，割交州以南分海南三郡，□徽為安遠將軍，領九真太守，以校尉陳时代變為交趾。

（北宋）曾公亮、丁度等奉敕撰《武經總要》前集卷二十《邊防》：

太平興國中，伐交州。命蘭州團練使孫全興師三將兵由邕州路進師。欽州，寧越郡，漢合浦縣，梁置州，唐初置總管府，本朝移治南賓縣。

(北宋) 欧阳修等《新唐书》卷四十三《志第三十三上地理七上》:

嶺南道，蓋古揚州之南境，漢南海、鬱林、蒼梧、珠崖、儋耳、交趾、合浦、九真、日南等郡。韶、廣、康、端、封、梧、藤、羅、雷、崖以東為星紀分，桂、柳、鬱林、富、昭、蒙、龔、繡、容、白、羅而西及安南為鶉尾分。……

潘州南潘郡，下。本南宕州南巴郡，武德四年以合浦郡之南昌、定川置。本治南昌，貞觀元年徙治定川，八年更名，後徙治茂名。後廢，地入高州。永徽元年復以茂名、南巴、毛山三縣置。土貢：銀。戶四千三百，口八千九百六十七。縣三。茂名，下。本隸高州，以茂名水名，貞觀元年來屬。潘水，下。武德五年置，以潘水名，又析南昌、定川置陸川、思城、溫水、宕川四縣。貞觀八年省思成，後以定川、宕川隸牢州，陸川、溫水隸禺州，後省南昌。二十三年析潘水置毛山縣，以毛山名。其後省潘水縣。開元二年改毛山曰潘水。南有博畔鎮。南巴。下。本隸高州，武德五年置，永徽元年來屬。……

雷州海康郡，下。本南合州徐聞郡，武德四年以合浦郡之海康、隋康、鐵杷置。貞觀元年更名東合州，八年又更名。土貢：絲電、班竹、孔雀。戶四千三百二十，口二萬五百七十二。縣三。海康，中。遂溪，下。本鐵杷、椹川二縣，後併省，更名。徐聞。下。本隋康，貞觀二年更名。……

容州普寧郡，下都督府。本銅州，武德四年以合浦郡之北流、普寧置。貞觀八年更名。元和中徙治普寧。土貢：銀、丹沙、水銀。戶四千九百七十，口萬七千八十五。縣六。有經略軍。普寧，下。北流，下。武德四年析置豪石、宕昌、南流、陵城、新安五縣。貞觀十一年省新安，後又省豪石、宕昌。北三十里有鬼門關，兩石相對，中闊三十步。陵城，下。渭龍，下。武德四年析普寧置。欣道，下。本寧人，隸藤州。貞觀二十三年更名，來屬。陸川。下。本隸東峨州，唐末來屬。…

白州南昌郡，下。本南州，武德四年以合浦郡之合浦地置，六年更名。土貢：金、銀、珠。戶二千五百七十四，口九千四百九十八。縣四。博白，下。武德四年置，并置朗平、周羅、龍豪、淳良、建寧五縣。貞觀六年以廉州之大都隸之。十二年省朗平、淳良，後又省大都。大曆八年以龍豪隸順州。西南百里有北戍灘，咸通中，安南都護高駢募人平其險石，以通舟楫。建寧，下。周羅，下。南昌。下。本隸潘州，後來屬。

順州順義郡，下。大曆八年，容管經略使王翊析禺、羅、辯、白四州置。土貢：銀。戶五百九。縣四。龍化，下。武德四年置，以西有龍化水名之，六年隸辯州。溫水，下。本隸禺州。南河，下。武德五年析石龍置，隸羅州。龍豪。武德四年析合浦置，隸白州。

廉州合浦郡，下。本合州，武德四年曰越州，貞觀八年更名，以本大廉洞地。土貢：銀。戶三千三十二，口萬三千二十九。縣四。合浦，中下。武德五年置安昌、高城、大廉、大都四縣。貞觀六年置珠池縣。後以大都隸白州。十二年省珠池、安昌入焉。封山，下。武德五年置姜州，并置東羅、蔡龍二縣。貞觀十年州廢，以封山、東羅、蔡龍來屬。後省

東羅。蔡龍，下。以蔡龍洞名之。貞觀十二年省高城縣入焉。大廉。下。

（北宋）歐陽忞《輿地廣記》卷二：

右交州。領南海、鬱林、蒼梧、交趾、合浦、九真、日南等郡國凡七。始皇罷侯置守，郡縣天下。漢興，以秦地太大，更加置郡國。至武帝攘却胡越，開地斥境，改雍曰涼，改梁曰益。又置徐州，復禹舊號，置交趾、朔方，凡十三州，部刺史而不常所理。至哀平之際，新置郡國六十三，與秦四十合一百三焉。

（北宋）歐陽忞《輿地廣記》卷二：

廣州領南海、臨賀、始安、始興、蒼梧、鬱林、桂林、高涼、高興、寧浦凡十郡。晉武帝太康元年平吳，分為十九州部，置司州，理洛陽。兗，理廩丘。荆，理項。冀，理房子。并，理晉陽。青，理臨淄。徐，理彭城。荆初理陽，後理江陵。揚，初理壽春，後理建業。涼，理武威。分三輔為雍，理京兆。分隴山之西為秦，理上邽。益，理成都。分巴漢之地為梁，理南鄭。分雲南為寧，理雲南。幽，理涿。分遼東為平，理昌黎。交，理昌編。分合浦之北為廣，理番禺。又增置郡國二十有一，凡州百五十有六，縣千百有九，以為冠帶之國，盡秦漢之土。

（北宋）歐陽忞《輿地廣記》卷三十五《廣南東路》：

下新州。古百越地，秦屬南海郡。二漢屬合浦郡，晉屬蒼梧郡。穆帝分立新寧郡，宋齊因之，梁立新州。隋平陳，郡廢。大業初，州廢，屬信安郡。唐武德二年，平蕭銑，立新州。天寶元年，曰新昌郡，後改曰新興。

（北宋）歐陽忞《輿地廣記》卷三十五《廣南東路》：

中新興縣，二漢臨光縣，地屬合浦郡。晉置新寧縣，屬蒼梧郡。穆帝分立新寧郡，後改曰析興，梁改新州，隋因之。大業初，省索盧入焉。唐武德二年，析置索盧、新昌、單牒、永順四縣，後省新昌、單牒。乾元後，又省索盧。皇朝開寶五年，省永順，皆入焉。信安鎮，本義寧縣。宋置，屬新會郡。隋屬廣州。開皇十年省新夷、初賓二縣，入義寧省，始康縣入封平。大業初，省封平入焉，唐屬廣州。

（北宋）歐陽忞《輿地廣記》卷三十五《廣南東路》：

下南恩州。古百越地，秦屬南海郡，二漢屬合浦郡，吳屬高興郡，晉以後因之，齊立齊安郡，梁立桂陵、陽春二郡，隋平陳，郡廢，屬高州，後屬高涼郡。唐武德四年，立春州。貞觀二十年，立恩州。天寶元年，改恩州曰恩平郡，春州曰南陵郡，五代為南漢所有。

（北宋）歐陽忞《輿地廣記》卷三十六《廣南西路上》：

下都督府容州。古百越之地。秦屬象郡。漢屬南越后，及東漢，屬合浦郡。晉宋以後因之。隋為合浦、永平二郡。唐武德四年平蕭銑，立銅州。貞觀八年，改為容州。天寶元年，曰普寧郡。五代為南漢所有，升為寧遠軍節度。皇朝開寶五年，廢繡、禺、順三州入

焉。

（北宋）歐陽忞《與地廣記》卷三十六《廣南西路上》：

中北流縣。隋置，屬合浦郡。唐武德四年立銅州，貞觀八年曰容州，元和中州徙治普寧。故禺州本東峩州，唐乾封四年析白、辯、實、容四州置。總章元年更名，天寶元年曰溫水郡。

（北宋）歐陽忞《與地廣記》卷三十六《廣南西路上》：

上普寧縣。本漢合浦縣地。後廢陰石縣。梁立陰石郡，隋廢郡，改縣為奉化，屬藤州。開皇十九年又改今名，唐分屬容州。元和中州自北流徙治於此。故繡州，本二漢河林縣地。唐武德四年立陵州。六年更名繡州。天寶元年曰常林郡。皇朝開寶五年，州廢，又省常林、阿林、羅繡三縣入普寧。故欣道縣，本隋寧人。唐貞觀二十三年更名來屬。故渭龍縣，唐武德四年析普寧置。開寶五年並廢，入普寧，有容江、繡江。

（北宋）歐陽忞《與地廣記》卷三十七《廣南西路下》：

中下南流縣。本隋北流縣，地屬合浦郡。唐屬牢州，為州治焉。皇朝開寶七年廢州，省定川、安川二縣，入南流來屬，而自鬱林縣徙州治此。故撫安縣，本西甌之地，唐永淳元年開古黨洞，立黨州并置撫安、善勞、善文、寧仁、安仁、懷義、福陽、古符八縣。二年析安仁以下四縣，立平琴州。垂拱三年州廢，神龍元年復置。天寶元年黨州曰寧仁郡，平琴州曰平琴郡，至德中更安仁曰容山，後廢平琴州，入黨州，後又省善文、寧仁、福陽、古符四縣。……

中博白縣。本漢合浦縣地，唐武德四年析立南州，兼置博白、周羅、建興等縣，而州治博白，六年更名白州，天寶元年曰南昌郡。

（北宋）歐陽忞《與地廣記》卷三十七《廣南西路下》：

上合浦縣。漢立合浦郡。吳曰珠官郡。晉復為合浦郡。宋兼立越州。時州始立，以西江督護陳伯紹為刺史，鑿山為城門，以威服俚獠。齊、梁、陳因之。隋廢，大業初復立。唐為越州，正觀中改為廉州，以本大廉洞地。皇朝開寶五年省封山、蔡龍、大廉三縣入合浦，太平興國八年省合浦入石康，咸平元年復置。故封山、蔡龍，唐武德五年置，屬廉州，正觀十年來屬。故大?縣。武德五年分合浦置。有糠頭山，昔南越王佗屯軍於此，舂穀積糠如山。有廉江、瘴江，一名合浦。有珠母海，郡人採珠之所。東漢時，郡政煩苛，珠徙。交趾孟伯周為守，有惠化，去珠復還。

（北宋）歐陽忞《與地廣記》卷三十七《廣南西路下》：

中下上林縣，唐武德四年析嶺方、置及立南方州。貞觀八年改曰澄州。天寶元年曰賀水郡。皇朝開寶五年，州廢，以縣屬邕州。端拱三年，來屬。故止戈、無虞二縣，與上林同置，屬澄州。故賀水縣，武德四年析馬平置，屬柳州，八年屬澄州。開寶五年皆省，入上林。有上林洞，都澧水。

下橫州。春秋戰國為駱越之地，秦屬桂林郡，漢屬鬱林、合浦二郡。吳立寧浦郡，晉、宋、齊因之。梁分立簡陽郡。隋平陳，二郡並廢，立簡州。開皇十八年，改為綠州。大業二年，州廢，屬鬱林郡。唐武德四年，立簡州。六年，改曰南簡州。貞觀八年，更名橫州。天寶元年，曰寧浦郡，五代為南漢所有。

（北宋）歐陽忞《與地廣記》卷三十七《廣南西路下》：

下寧浦縣。本漢廣鬱縣地。吳分置寧浦縣及立郡。晉以後因之，梁分立簡陽郡，隋立簡州，改為綠州。唐為南簡州，改為橫州。故從化縣，本淳風，武德四年分寧浦置。貞觀元年更名。故樂山縣，本漢廣鬱縣地，屬合浦郡。梁立樂陽郡，隋平陳，郡廢，為樂陽縣，屬尹州。開皇十八年更名，唐武德四年來屬。

（北宋）歐陽忞《與地廣記》卷三十七《廣南西路下》：

下化州，古百越之地，秦屬象郡，漢屬南越，後及東漢屬合浦郡。吳屬高興郡，晉以後屬高涼郡。梁復高興。隋平陳，郡廢，屬羅州。大業初，州廢，屬高涼郡。唐武德五年，屬羅州。六年，立南石州。正觀九年，改為辯州。天寶元年，曰陵水郡。天祐元年，朱全忠以辯汴聲近，更名敷州，後復故。五代為南漢所有。

（北宋）歐陽忞《與地廣記》卷三十七《廣南西路下》：

下石龍縣。本漢高涼縣，地屬合浦郡。皇朝改曰化州。故陵羅、龍化二縣與石龍同置。

（北宋）歐陽忞《與地廣記》卷三十七《廣南西路下》：

中吳川縣。隋屬高涼郡。唐屬羅州。皇朝開寶五年，州廢，以吳川來屬。故廉江縣，本石城。昔宋將檀道陵羅江口築石城，立羅州。梁、陳因之，唐天寶元年更名。故幹水縣，本石龍，唐改曰招義，又改曰幹水。零綠鎮，本零綠縣。三縣皆屬羅州、招義郡。開寶五年，州廢。皆省入吳川。

下高州，古百越之地，秦屬南海郡，漢屬南越，東漢屬合浦、蒼梧二郡。吳立高涼郡。晉以後因之。梁兼立高州。隋平陳，郡廢。大業初，州廢，後立高涼郡。唐武德六年，立高州，本治高涼。正觀二十二年，徙治良德。天寶元年，置高涼郡。大歷十一年，徙治電白。

（北宋）歐陽忞《與地廣記》卷三十七《廣南西路下》：

下雷州，古百越之地，秦象郡地，二漢以後屬合浦郡。梁分立合州、大同末以合淝為合州，以此為南合州。隋平陳，復為合州。大業初，州廢，屬合浦郡。武德五年，復立南合州。正觀元年，改為東合州。八年又更今名。天寶元年曰海康郡。五代為南漢所有。今縣一。

下海康縣。本漢徐聞縣，地屬合浦郡。梁立南合州。隋為合州，置海康縣，唐復為南合州，改曰雷州。故遂溪縣，本隋鐵把、椹川二縣，屬合浦郡。唐武德四年來屬，後併省更名。故徐聞縣，本隋康，正觀二年更名。

（北宋）歐陽忞《與地廣記》卷三十七《廣南西路下》：

下欽州。古百越之地，秦屬象郡，漢以後屬合浦郡。宋立宋壽郡，齊以後因之。梁兼立安州。隋平陳，郡廢。開皇十八年，改州曰欽州。大業初州廢，立寧越郡。唐武德四年改曰欽州。天寶元年曰寧越郡。

（北宋）歐陽忞《與地廣記》卷三十七《廣南西路下》：

望靈山縣。本漢合浦縣地。隋開皇十八年置南賓縣。唐正觀十年更名，後自欽江徙州治此。

（北宋）歐陽忞《與地廣記》卷三十七《廣南西路下》：

下鬱林州，古蠻夷之地，春秋戰國為西瓯。秦立桂林郡，後為南越尉佗所并，漢以後屬合浦、鬱林二郡。隋平陳，郡廢，屬尹越二州。大業初，復屬合浦、鬱林二郡。唐立黨牢、鬱林二州。天寶元年為定川、寧仁、鬱林三郡。

（北宋）歐陽忞《與地廣記》卷三十七《廣南西路下》：

下廉州。古百越之地，秦屬象郡，漢合浦郡。東漢因之，吳改曰珠官郡，晉復曰合浦。宋分立臨瘴郡，兼立越州。齊、梁、陳因之。隋平陳，郡廢。大業初，改州曰祿州，尋改為合州，又廢，而立合浦郡。唐武德四年立越州。正觀八年改名，天寶元年曰合浦郡。

（北宋）歐陽忞《與地廣記》卷三十七《廣南西路下》：

下瓊州。漢珠崖縣地。自合浦、徐聞南入海，得大州，東西南北方千里。武帝元封元年，略以為儋耳、珠崖郡。自初為郡縣吏卒，中國人多侵陵之，故率數歲一反。昭帝廢儋耳，併珠崖。元帝用賈捐之言，又棄珠崖郡。東漢置珠崖縣，屬合浦郡。吳赤銘烏五年復立珠崖郡。晉平吳，郡廢，入合浦，後復立朱崖郡。梁兼立崖州。隋、陳因之，唐正觀五年，析崖州，立瓊州。天寶元年，曰瓊山郡。自乾封後沒山洞蠻。貞元五年，嶺南節度使李復討平之。

（北宋）葉廷珪《海錄碎事》卷四上《地部下》：

珠官郡 孫權改合浦為珠官郡。

（南宋）鄭樵《通志》卷四十《地理略第一》：

分合浦之北為廣，治番禺。

（南宋）周去非《嶺外代答》卷一《地理門》：

百粵故地

自秦皇帝并天下，伐山通道，略定揚粵，為南海、桂林、象郡。今之西廣，秦桂林是也。東廣，南海也。交趾，象郡也。漢武帝平南海，離秦桂林為二郡，曰鬱林、蒼梧。離象郡為三，曰交趾、九真、日南。又稍割南海、象郡之餘壤為合浦郡。

(南宋) 吕祖谦《大事记解题》卷十二：

鬱林郡。今鬱林、漢屬鬱林、合浦二郡。邕、融、象、潯、貴、柳、宾、橫州之地；合浦郡，今南、恩、新、容、高、化、雷、欽、廉州之地。

(南宋) 王应麟《通鉴地理通释》卷二《历代州域总叙中》：

武帝開越攘胡，初置十七，南海、蒼梧、鬱林、合浦、交趾、九真、日南、珠崖、儋耳九郡。

交州刺史部，南海、鬱林、蒼梧、交趾、合浦、九真、日南七郡。

(南宋) 王称《东都事略》卷一百三十《附录八》：

交趾，本南粵之地，漢武帝平南粵，分其地為儋耳、朱厓、南海、蒼梧、鬱林、合浦、交趾、九真、日南，凡九郡，置交趾刺史以領之。

(南宋) 胡三省《通鉴释文辨误》卷六：

七年，分交、廣置越州，治臨漳。史炤《释文》曰：臨漳，本漢鄴縣地。余按晉愍帝諱鄴，改鄴縣為臨漳，尋淪沒於石勒，復為鄴縣。東魏天平初，始復分鄴，立臨漳縣。宋分交、廣置越州，安能遠北界治魏郡之臨漳？劉昫曰：廉州合浦縣，宋分置臨漳郡，則越州之所治者，合浦之臨漳也。

(南宋) 胡三省《通鉴释文辨误》卷九：

南州刺史龐孝恭。史炤《释文》曰：南州，屬劔南道羈縻州。武德二年開南蠻置，二年更名楚州，四年復故名。余按《新唐书地理志》，武德四年以合浦郡之合浦、南昌二縣置南州。《通鑑》下文書南越州寧道明、高州首領馮暄俱反。南越州，今之廉州。高州，今猶如故。則三州相挺而反，皆在嶺南道，此所謂南州乃合浦之南州，非劔南道之羈縻州，明矣。

(元) 马端临《文献通考》卷三百二十三《輿地九》：

南恩州，秦屬南海郡，二漢為合浦郡地。……

春州，秦屬南海郡，二漢屬合浦郡地。……

高州，秦以前土地與晉康郡同，二漢屬合浦郡。……

新州，秦屬南海郡，二漢屬合浦郡。…

橫州，秦桂林郡，二漢鬱林、合浦二郡地。…

羅州，秦屬象郡，二漢屬合浦郡地。…

潘州，秦屬象郡，二漢屬合浦。……

容州，秦屬象郡，二漢屬合浦郡，隋為合浦、永平二郡地。……

化州，秦屬象郡，二漢屬浦郡。……

白州，秦屬象郡，二漢屬合浦郡。……

牢州，秦為象郡地，二漢屬日南郡。吳省，晉平吳復置。宋分置南流郡，齊、梁曰定川郡，隋屬合浦郡。……

廉州，秦象郡地，漢置合浦郡，後漢同。吳改為珠官，晉又為合浦郡。宋因之，兼置臨瘴郡及越州，齊又因之。煬帝改為祿州，尋改為合州，又廢州置合浦郡。唐置廉州，或為合浦郡，屬嶺南道，領縣四。……

雷州，秦象郡地，二漢以後並屬合浦郡地，梁分置合州。大同末，以淝為合州，此為南合州。隋平陳，不改。煬帝初，州廢，屬合浦郡。唐置雷州，或為海康郡，屬嶺南道，領縣三。……

巖州，土地與合浦郡同。

（元）馬端臨《文獻通考》卷三百十五《輿地考一》：

晉武帝太康元年平吳，分為十九州部，置司州，治洛陽。兗，治廩丘。豫，治項。冀，治房子。并，治晉陽。青，治臨淄。徐，治彭城。荆，初治襄陽，後治江陵。揚，初治壽春，後治建業。涼，治武威。分三輔為雍，治京兆。分隴山之西為秦，治上邽。益，治成都。分巴漢之地為梁，治南鄭。分雲南為寧，治雲南。幽，治涿。分遼東為平，治昌黎。交，治龍編。分合浦之北為廣，治番禺。

（元）馬端臨《文獻通考》卷三百二十八《裔考七》：

交趾，本漢初南越之地。漢武帝平南越，分其地為儋耳、珠厓、南海、蒼梧、鬱林、合浦、交趾、日南、九真，凡九郡，置交趾刺史以領之。

（明）宋濂《元史》卷六十三《地理六》：

廉州路，唐為合浦郡，又改廉州。元至元十七年設總管府，戶五千九百九十八，口一萬一千六百八十六，領縣二，合浦、石康。

（明）姚虞《嶺海輿圖》：

高州府，漢末孫權以合浦之高涼縣置高涼郡，梁置高州，歷隋、五代。

廉州府，古合浦郡，吳為珠官郡，尋復。到宋置越州郡，歷隋、梁、唐，各易置，貞觀中改廉州。

雷州府，漢置徐聞縣，屬合浦郡，歷齊、梁。陳始為雷州，更合州，唐復為雷州，歷代因之。

（明）李賢等《大明一統志》卷八十一《肇慶府》，

《禹貢》揚州之南境，天文牛、女分野。春秋時為百粵地，秦為南海郡地，漢武帝平南粵，為蒼梧、合浦二郡地。三國吳及晉屬蒼梧郡。劉宋置綏建郡，治四會縣。梁置高要郡，治高要縣。隋平陳，廢綏建郡，入四會縣。又廢高要郡，置端州。大業初改信安郡。

唐復改端州，又於四會縣置南綏州，屬嶺南道。貞觀中改為潁州，尋廢。天寶初改端州為高要郡，乾元初復為端州。

古越地，天文牛、女分野，秦為南海郡地，漢為合浦郡之高涼縣，三國吳置高涼郡，後又置高興郡。晉以高興併入高涼郡，劉宋復置高興郡，梁兼置高州。隋平陳，郡廢州存。大業初，廢州置高涼郡，治高涼縣。唐武德中復置高州。天寶初改高涼郡。乾元初復為高州，治電白縣。

古南粵地，天文翼、軫分野，秦為象郡地，漢武平南粵，置合浦郡，三國吳改珠官郡，未幾復為合浦郡，劉宋於郡置越州。隋初，郡廢州存，大業初改曰祿州，尋改為合州，又廢州，為合浦郡，治合浦縣。唐初罷郡，復置越州，貞觀中改為廉州，因郡有大廉洞，故名。天寶初復為合浦郡，乾元初又復為廉州。

（明）李賢等《大明一統志》卷八十二《廉州府》：

古粵地，天文牛、女分野，秦平百粵，置三郡，此屬象郡。漢為徐聞縣，屬合浦郡，梁分合浦郡，置合州，尋改南合州。隋仍為合州，治海康縣。大業初，州廢。唐武德間，復置南合州。貞觀初改為東合州，尋又改為雷州，因郡有擎雷水，故名。天寶初，改為海康郡，至德初復為雷州。

古粵地，天文牛、女分野，漢武平南粵，置珠崖、儋耳二郡。昭帝罷儋耳併入珠崖，元帝又罷珠崖郡。東漢置珠崖縣，隸合浦郡。三國吳置珠崖郡，治徐聞縣。晉省，入合浦。梁置崖州及珠崖郡，治義倫縣。隋初郡廢，大業中，州廢，復置珠崖郡及置儋耳、臨振二郡。唐置崖州及儋振等州，後又增置瓊州，治瓊山縣。天寶初改瓊山郡，乾元初復為廉州。

（明）章潢《圖書編》卷二十八《天圓地方圖》：

南越之地，漢分儋耳、珠崖、南海、蒼梧、合浦、鬱林、九真、日南等郡，而交州刺史領之。

（明）章潢《圖書編》卷二十九《地道總叙》：

廣東廣州府，揚州之南境，牛、女分野。春秋為南越地。秦置南海郡。後趙佗據其地。漢武為南海郡。韶州府，古揚州。牛、女分野。春秋為百粵地。舊國屬楚。秦為南海郡。漢初屬南越。漢武屬桂陽郡。南雄府，古雄州，牛、女分野，戰國屬楚。秦屬南郡。漢兼屬桂陽郡。惠州府，古揚州，牛、女分野。秦為南海郡，漢初屬南越國。潮州府，古揚州，牛、女分野，古為閩越地。秦屬南海郡。漢初屬南越。肇慶府，揚州之南境，牛、女分野。春秋為百粵地，秦為南海郡，漢為蒼梧、合浦二郡。高州府，古越地，牛女分野。秦為南海郡，漢為合浦郡，三國吳置高涼郡。廉州府，古南越地，翼、軫分野。秦為象郡，三國吳改珠崖郡。雷州府，古百粵地，牛、女分野，漢為徐聞縣。瓊州府，古百越地，牛、女分野，漢武置珠崖、儋耳二郡。

（明）章潢《圖書編》卷三十二《周職方春秋列國圖總敘》：

晉初分為十九州部，置司州，治洛陽。兗，治廩丘。豫，治項。冀，治房子。并，治晉陽。青，治臨淄。徐，治彭城。荆，初襄陽，後江陵。揚，治壽春，後建業。涼，治武威。分三輔為雍，治京兆。分隴山之西為秦，治上邽。益，治成都。分巴漢為梁，治南鄭。分雲南為寧，治雲南。幽，治涿。分遼東為平，治昌黎。交，治龍編。分合浦之北為廣，治番禺。

（明）章潢《圖書編》卷三十二《周職方春秋列國圖總敘》：

在天文牽牛、婺女，則越之分野，兼得楚之交。秦始皇畧定揚越，謫戍五方，南守五嶺。後遣任囂攻取陸梁之地，遂平南越，置郡，此為南海、桂林象，置南海尉以典之，所謂東南一尉者也。秦末趙佗遂王其地，漢因封之，佗後數代，其相呂嘉反叛，武帝使伏波將軍路博德討平之。元封初又遣軍自合浦、徐聞入南海，至大州，方千里，畧得之，後兼置交趾刺史。其餘土宇，自漢以後，歷代開拓。後漢建武中，交趾女子徵側、妹徵貳反，於是九真、日南、合浦蠻俚皆應之，自立為交趾帝。使馬援平定交部，始調立城郭，置井邑，至獻帝乃立為交州。其邊州詔使持節給鼓吹，以重威鎮，加九錫六佾之舞。

（明）章潢《圖書編》卷四十九《兩廣總圖》：

漢孝武帝平南粵，陀孫光降以其地，為南海、蒼梧、鬱林、合浦、日南、九真、交趾、儋耳、珠崖九郡，置交趾部刺史領之，治蒼梧。元帝時羅儋耳、珠崖。歷東漢末，七郡如故。吳仍漢制，分領於荆、交二州，其後析合浦以北，南海、蒼梧、鬱林三郡屬廣州，治番禺，餘乃屬交州治龍編。……宋泰始中，置越州，與交、廣並三刺史部治，合浦析置宋壽、南流、臨漳等八郡屬之，又析置宋康、綏建、海昌、宋熙、樂昌始屬廣州，而珠崖亦稍收為郡。

（明）彭大翼《山堂考肆》卷十五《地理》：

粵地牽牛、婺女之分野也。三代時蓋藩服，世稱古百粵，粵即越國，周顯王時楚滅越，其族散處江南海上，各為君長。有歐越、雒越之屬，甚蕃，故曰百粵。以粵為揚州南境，又曰揚越。秦始皇利粵犀象、珠璣，乃使尉屠睢統五軍，監祿鑿渠以通糧道，殺西歐君譯吁宋，越人皆入叢薄中與禽獸處，莫肯附秦。陰置桀駿，以為將夜攻秦人，殺尉屠睢，秦乃發戍備。之後王翦滅楚，乘勝畧定揚越、陸梁地，為桂林、象郡。秦末，為南越王趙佗所據，傳至趙光時，漢武平南越，光遂降漢，以其地為蒼梧、鬱林、合浦郡，屬交趾部。又三越，杭州為吳，廣州為南越，福州為閩越，或問閩中謂之閩越者何，蓋秦立閩中郡，及漢興師，越人佐漢有功，復立無諸為閩越王。王閩中故地，郡治今建寧之建安，福州之侯官是其地，故謂之閩越。

(明)張國經修、鄭抱素訂正《廉州府志》卷一《圖經卷》(崇禎):

廉州府……合浦、高城、安昌、大廉、大都。貞觀中改為廉州，屬嶺南道。尋復為合浦郡，隸邕管經畧使。五代時為僞漢劉隱之所據。

(明)張國經修、鄭抱素訂正《廉州府志》卷一《圖經卷》(崇禎):

廉州府，三代以前為百粵地，在禹貢之外，未入職方。秦始置合浦郡，隸象郡。漢置合浦郡，領縣五。合浦、徐聞、高涼、臨元、朱崖。三國時，吳改合浦郡為珠官郡，尋復為合浦郡，領縣五。晉因之。劉宋太始中，以合浦郡兼置臨瘴郡及越州，梁又拓其地，置交州，分合浦、徐聞置合州，尋改為南合州。隋廢合浦郡為祿州，又為合州，尋復之。唐武德中改合浦郡為越州，領縣五。合浦、高城、安昌、大廉、大都。貞觀中改為廉州，屬嶺南道。尋復為合浦郡，隸邕管經畧使。五代時為僞漢劉隱之所據。

合浦縣，漢元鼎六年始置，合浦縣屬合浦郡。吳、晉因之。隋廢其縣。唐復之，隸越州，貞觀八年改越州為廉州。

(明)張國經修、鄭抱素訂正《廉州府志》卷二《地理卷》(崇禎):

蔡龍縣 舊在廉州北一百五十里，唐初置，屬姜州。貞觀中，改為廉州，後廢。

東羅縣 唐初置，屬姜州，貞觀中，省入廉州，後廢。

大廉縣 在舊廉州東南一百里，唐初置，後廢，入石康。

高城縣 在廉州境，貞觀中，省入蔡龍縣。

(清)張英等纂輯《御定淵鑿類函》卷三百三十四《州郡部一》:

晉太康平吳之後，天下一統，平吳得州四，交、廣、荆、揚也。郡四十三，孫權置臨賀、武昌、朱崖、新安、廬陵五郡，孫亮又置臨川、臨海、衡陽、湘東四郡，孫休置天門、建平、建安、合浦四郡。

(清)張英等纂輯《御定淵鑿類函》卷三百三十五《州郡部二》:

敘嶺南道者，《禹貢》揚州之南境，其地皆粵之分。《地理志》云：今蒼梧、蔚林、合浦、交趾、九真、日本、南海皆粵分。自嶺而南至海，盡其地。廣州，故南海郡。秦末，南海尉趙佗王有其地。

(清)張英等纂輯《御定淵鑿類函》卷三百三十八《州郡部五》:

又曰雷州府，古粵地，天文牛、女分野。秦屬象郡。漢曰徐聞，梁、隋曰合州，曰海康。唐曰雷州。元、明為雷州府。國朝因之。領縣三：海康、遂溪、徐聞。又曰廉州府，古南粵地，天文翼、軫分野。秦為象郡地。漢曰合浦。三國吳曰珠官。劉宋曰越州，隋曰合州，唐曰廉州。宋曰太平。元、明為廉州府。國朝因之。領州一：欽。縣二：合浦、靈山。

(清)金鉉《廣西通志》卷四《圖經》:

廣西總圖經

粵以東屬南海郡，粵以西屬桂林郡，而慶遠思恩，太平以達，交州俱屬象郡焉。漢武平南越，趙佗孫光降，以其地為蒼梧、鬱林、合浦郡，屬交趾部。三國吳析合浦以北蒼梧、鬱林郡，屬廣州。

(清)金鉉《廣西通志》卷七《沿革二》:

省西南八百五十里為南寧府，古邕管也，十萬山之險峙其南，崑崙之塞踞其北，地本左江，而江流一出廣源，一出莪利，又自有左右兩江之號，兩江之所包絡，地方數千里，蠻崗三十六而總其樞於南寧，是以內制諸蠻，外控交趾，於斯為重地。云秦為桂林，兩漢為鬱林、合浦，至晉分置寧浦、晉興二郡，南朝因之，隋改尹州，自唐及宋，為邕州，列於五管，建牙置師，與桂州等，元為南寧路，明改為府，以橫州及永淳屬焉，又置新寧州、隆安縣，益以土司崗寨。

(清)金鉉《廣西通志》卷九《沿革四》:

省西南千四百一十里，為鬱林州北界，梧、潯東南接高、廉，西連橫貴、大容之山，綿亘數百里，屹峙其後，南流、定川之水發源容山，繞州而南奔注於海，是交、廣之襟喉也。秦屬桂林郡，漢以後屬合浦、鬱林郡地。唐置鬱州，又置銅、白、牢三州，尋廢銅州，為容州，改鬱州為鬱林州。宋廢牢州，移鬱林州於今治，又廢白州以博白來屬。明廢容州，以北流、陸川來屬。鬱林州領四縣，隸梧州府。

(清)金鉉《廣西通志》卷四十五《古蹟二》:

平山縣，在州治北，吳置，為合浦北部都尉治。梁時省。今州治東北從化鄉，有平山村，蓋因舊縣得名。興道縣，在州治東南，《宋志》晉太康元年以合浦之連道置，梁時省。

(清)穆彰阿，潘錫恩等纂修《大清統一志》卷三百三十八《广东省》:

《禹貢》荆、揚二州之南裔，周為藩服。戰國時為百越，亦曰揚越。秦時號陸梁地，始皇三十三年取其地，置南海郡。漢初為南越國，元鼎六年平其地，置南海、蒼梧、合浦、珠崖、儋耳等郡。元封五年，屬交趾部刺史。元鼎五年，省儋耳郡，初元三年省珠崖郡，後漢建安中徙交州，治南海郡。三國吳黃武五年，分交州置廣州，尋罷廣州，併屬交州。永安六年，復分置廣州。晉太康中平吳，仍為廣州及荆、湘、交三州地。南北朝宋初亦為廣州，泰始七年分交、廣二部，置越州。齊因之，梁天監六年，分湘、廣二州，置衡州。普通四年分置成州、合州、建州，五年分置東揚州，自後州郡滋多。陳因之，隋開皇十年，平陳置廣、循二州總管府。大業初府廢，三年改諸州為南海、龍川、義安、高涼、信安、永熙、蒼梧、合浦、珠崖、寧越、熙平等郡。隋末陷於蕭銑，唐武德四年，復改諸郡為州，置廣州總管府。貞觀元年置嶺南道，天寶元年又改諸州為郡。至德元載置嶺南節度使，乾

元元年復改諸郡為州。咸通三年分為嶺南東道，乾寧三年賜號清海軍節度。

(清) 穆彰阿，潘錫恩等纂修《大清統一志》卷三百四十五《肇慶府》：

《禹貢》揚州南徼，春秋戰國為百越地，秦為南海郡地，漢為蒼梧郡、南海郡、合浦郡屬地。三國吳分屬廣、交二州，晉因之。宋永初二年，改屬南海郡，齊因之。梁天監中始置高要郡。隋平陳，廢郡。開皇九年，置端州，大業初改州為信安郡。唐武德四年，復曰端州。天寶元年復曰高要郡，乾元元年復曰端州，咸通三年屬嶺南東道。

(清) 穆彰阿，潘錫恩等纂修《大清統一志》卷三百四十七《高州府》：

《禹貢》揚州南境，秦為南海郡地。漢為合浦郡高涼縣地。三國晉宋為高涼、高興二郡地。梁為高州地，又分置電白郡。隋平陳，郡廢，為高涼、永熙二郡地。唐初屬高州，貞觀八年分置潘州，二十二年又徙置高州。天寶初改高州，曰高涼郡，潘州曰南潘郡，乾元初復曰高州、潘州，皆屬嶺南道。

(清) 穆彰阿，潘錫恩等纂修《大清統一志》卷三百四十八《廉州府》：

《禹貢》荊州南境，秦為象郡地，漢為合浦郡之合浦縣，後漢為合浦郡治，三國吳改為珠官郡，尋復故，晉因之。宋泰始七年，分置越州，齊、梁因之，隋平陳，郡廢。大業初改州曰祿州，尋復為合浦郡。唐武德五年復曰越州，貞觀八年改曰廉州，天寶初曰合浦郡，乾元初復曰廉州，屬嶺南道。

合浦故城，在合浦縣東北，漢置，唐為廉州治。《寰宇記》：開寶五年，自舊州移理西南四十里，地名長沙。

(清) 穆彰阿，潘錫恩等纂修《大清統一志》卷三百四十九《雷州府》：

《禹貢》揚州南境，秦為象郡地，漢元鼎六年開置合浦，郡治徐聞縣。後漢為合浦郡地，晉宋因之，南齊仍移合浦郡來治。梁普通四年分置合州，大清元年曰南合州，隋平陳，復曰合州，治海康縣。大業初州廢，仍屬合浦郡。唐武德四年復置南合州，貞觀元年更名東合州，八年始改曰雷州。天寶元年曰海康郡，乾元元年復曰雷州，屬嶺南道。

(清) 穆彰阿，潘錫恩等纂修《大清統一志》卷三百五十《瓊州府》：

《禹貢》揚州西南徼外地，春秋戰國為揚越地，秦末屬南越，漢元封元年開置珠崖儋耳二郡，始元五年省儋耳郡，初元三年省珠崖郡，入合浦，為都尉治。後漢仍屬合浦郡，三國吳赤烏五年，復置珠崖郡。晉平吳，省入合浦。隋大業中復置珠崖郡，唐武德五年置崖州。貞觀元年置都督府，五年分置瓊州。天寶初改崖州，曰珠崖郡，瓊州曰瓊山郡。乾元初復曰崖州、瓊州，俱屬嶺南道。貞元五年移都督府於瓊州。

(清) 穆彰阿，潘錫恩等纂修《大清統一志》卷三百六十七《鬱林州》：

古百粵地，秦桂林郡地，兩漢至晉為鬱林、合浦二郡地，劉宋分置南流郡，齊又分置定川郡，梁陳時省南流郡，隋平陳，廢定川郡，為定川縣，屬合浦郡。唐武德四年，分置南流縣，屬容州。貞觀十一年徙牢州治南流，兼領定川縣，天寶初曰定川郡，乾元初復曰

牢州，屬嶺南道。

（清）张玉书编纂《御制佩文韻府》卷三十七之七：

合浦。《漢書地理志》郡縣五，徐聞、高涼、臨允、朱盧。又粵地牽牛、婺女之分埜也，今之蒼梧、鬱林、交趾、九真、南海、日南皆粵分也，又《南粵傳》以其地為儋耳、珠崖、南海、蒼梧、鬱林、交趾、九真、日南九郡。《後漢書孟嘗傳》嘗遷太守，郡不產穀實，而海出珠寶，先時宰守竝多貪，詭人採求，不知紀極，珠遂漸徙于交趾郡界。嘗到官，革易前敝，未踰，去珠復還，百姓皆反其業。《水經注》牢水南出交州郡治縣，漢武元鼎六年平越所置也。《元和志》：欽州，古越地，漢平南越置郡，今州即縣地也。《方輿勝覽》縣海曲出珠，號曰珠池。又廉江在州界，又名江。梁元帝《職貢圖》贊交河悠遠迴遘。《劉長卿詩》擁津臨上，印卧長沙。

（清）徐成棟纂修、孙焘校正《廉州府志》卷一《輿圖志》（康熙）：

廉州府……合浦、高城、安昌、大?、大都。貞觀中改為廉州，屬嶺南道。尋復為合浦郡，隸邕管經畧使。五代時為偽漢劉隱之所據。

（清）徐成棟纂修、孙焘校正《廉州府志》卷二《地理志》（康熙）：

蔡龍縣 舊在廉州北一百五十里，唐初置，屬姜州，貞觀中，改為廉州，後廢。

東羅縣 唐初置，屬姜州，貞觀中，省入廉州，後廢。

大廉縣 在舊廉州東南一百里，唐初置，後廢，入石康。

高城縣 在廉州境，貞觀中，省入蔡龍縣。

（清）张墉春总纂、陈治昌纂修、汪运协修《廉州府志》卷五《輿地五》（道光）：

蔡龙废县，在合浦县北，《旧唐书地理志》：武德五年属姜州，贞观十年州废，属廉州。

东罗废县，在县南，唐初置属姜州。贞观中省入廉州。

（清）张墉春总纂、陈治昌纂修、汪运协修《廉州府志》卷一《輿地一》（道光）：

廉州至京师六千五百四十七里，去东都五千八百三十六里，东至白州二百里，南至罗州三百五十里，西北至南安府一千里，北至领州七百里。

（清）张墉春总纂、陈治昌纂修、汪运协修《廉州府志》卷一《輿地一》（道光）：

廉州合浦郡下本合州。武德四年曰越州，贞观八年更名，以本大廉洞地。天宝元年改为合浦郡，乾元余年复为廉州。县四：俱在今廉州境。合浦、封山、蔡龙、大廉。

（清）张墉春总纂、陈治昌纂修、汪运协修《廉州府志》卷一《輿地一》（道光）：

廉州合浦郡军事。《元和郡县志》：古越地也。汉平南越置合浦郡，今州即汉合浦郡理也。《图经》云：黄武七年改为珠官郡，寻为合浦，宋置越州。《元和郡县志》：大业三年废合州为合浦郡。《通鉴》：唐平萧铣，隋合浦太守宁宣来降，罢合浦郡，又为越州。元宗改为合浦郡，后复为廉州。

廉州府，自汉武帝元鼎六年平南越，始置合浦郡，领县五。合浦、徐闻、高凉、临允、朱崖。三国孙吴时改合浦郡为珠官郡，寻复为合浦郡，仍领县五，晋因之。刘宋泰始七年以合浦析置临邽、越州二郡。齐梁及陈皆因之。隋大业初，废合浦郡为禄州，寻改为合州，又废州为合浦郡，郡治合浦县。唐武德四年，改合浦郡复为越州，五年置县四，高城、安昌、大廉、大都。贞观八年改为廉州属岭南道，因地有大廉峒故名，领县四。合浦、封山、蔡龙、大廉。天宝初复为合浦郡，隶邕管经略使。乾元初复为廉州，唐末五代季为南汉所据。

（清）周硕勋纂修、王家宪等校正《廉州府志》卷二《沿革》（乾隆）：

唐武宪中，改合浦郡复为越州，领五县。合浦、高城、安吕、大廉、大都。正观中，改为廉州属岭南道，因地有大廉峒故名。天宝初，复为合浦郡，隶邕管经略使。开元初，复为廉州领县六。合浦、高城、安昌、大廉、大都、博白。唐末五季为南汉所据。

（清）周硕勋纂修、王家宪等校正《廉州府志》卷五《世纪》（乾隆）：

唐太宗正观元年丁亥，詔嶺南以米充租□調便民也，分置越州，寻改廉州。此廉州之始。

（二）道里形胜

（东汉）班固《汉书》卷二十八下《地理志》：

粤地，牵牛、婺女之分壑，今苍梧、鬱林、合浦、交趾、九真、南海、日南，皆粤分也。

（唐）张守节《史记正义论例證法解列國分野》：

粤地，牵牛、婺女之分壑，今苍梧、鬱林、合浦、交趾、九真、南海、日南，皆粤分也。

（唐）杜佑《通典》卷一百七十二《州郡二》：

越地，牵牛婺女之分野，得汉之苍梧、鬱林、合浦、交趾、九真、南海、日南，皆越分野。

（后晋）刘昫《旧唐书》卷三十六《志第十六天文下》：

翼、軫，鶉尾之次。巳初起張十五度，中翼十二度，終軫九度。其分野：自房陵、白帝而東，盡漢之南郡、江夏。東達廬江南郡。濱彭蠡之西，得漢長沙、武陵、桂陽、零陵郡。又逾南紀，盡鬱林、合浦之地。

（北宋）李昉等奉勅撰《太平御覽》卷一百九十三《居處部二十一》：

又曰廉州，宋太始年，陳伯紹平夷至合浦，見三青牛，國之不獲，即其處置城，俗號青牛城。

（北宋）李昉等奉勅撰《太平御覽》卷七百十《服用部十二》：

《交州記》曰：合浦圍州有石室，其裏一石如鼓形，見榴木杖倚着石壁，採珠人常致祭焉。

（北宋）李昉等奉勅撰《太平御覽》卷七百七十《舟部三》：

劉欣期《交州記》曰：安定縣。有越王銅舡，潮退時有見者。合浦四十里有潮陰雨日，百姓推採，見銅舡出水上。

（北宋）李昉等奉勅撰《太平御覽》卷八百三十《資產部十》：

嚴欣期《交州記》曰：糠頭山。在合浦海口，傳云越王舂米於此，積糠所成。

（北宋）李昉等奉勅撰《太平御覽》卷八百五十《飲食部十三》：

劉欣期《交州記》曰：合浦海口有糠頭山，傳云越王舂米於此，積糠而成。

（北宋）樂史《太平寰宇記》卷一百六十二《嶺南道六》：

《南越志》云：桂林郡，本治陽溪，今移鬱江口，有銅鼓灘是也。武熙縣有桂山，圍山。《本草》云桂生山谷間，久服令人身輕。又平陽縣有陽溪，在縣數百里，伏流通於岷山。又云：潭中縣二百里，則桂林故郡所理也。

中留縣，秦置也，次三百里至於江，則桂江也，與鬱林合浦水並歸於海。建興三年，諸葛亮南征，遂分建寧、牂牁二郡地為興古郡。延康元年，步騭出交州，自長沙趨於此道。故《吳書》曰：權遣呂岱、步騭。將交州義士萬人出長沙。會玄德東下，武陵蠻夷蠢動，逆命騭上益陽，備既敗績，而靈、桂諸郡猶相驚擾。騭周旋征討，皆平之。有古終籐，俚人以為布，故《夏書》曰：島夷卉服，此之謂也。

（北宋）樂史《太平寰宇記》卷一百七十六《四夷五南蠻一》：

黃支國，漢時通焉。去合浦、日南三萬里，俗畧與朱崖相類。自武帝以來皆獻見，地貢銀、硃、玉璧、琉璃、奇石異物，大珠圓及二寸，而至圓者，置之平地，終日不停。

（北宋）楊侃編《兩漢博聞》卷二：

粵地，牽牛、婺女之分野也，今之蒼梧、鬱林、合浦、交趾、九真、南海、日南，皆粵分也。

（北宋）曾公亮丁度等奉敕撰《武經總要》前集卷二十《邊防》：

廉州，合浦郡，漢所置，吳改珠官，宋兼置臨瘴郡及越州，領郡三，並治於此。時西江督護陳伯紹為刺史，始立州，穿土為城，威服獠獠。唐置廉州，地界控海口，有瘴江，置二砦守之。東至白州百二十里，西至欽州三十里，南至大海六十里，北至欽州百四十里。東南、西南皆大海，東北白州二百六十里。

（北宋）曾公亮丁度等奉敕撰《武經總要》前集卷二十《邊防》：

雷州海康軍，漢屬合浦縣，梁置合州，後以合肥為合州，因加南字，唐為雷州，控入

海水路。東至海三十里，西至海一百五十里，南至海一百七十里，北至化州一百六十里。

（北宋）王欽若楊億等奉撰《冊府元龜》卷五百四：

太初四年，徙弘農都尉治武關，稅出入者以給。關吏卒食。《漢書地理志》弘農郡有故秦函谷關。上黨郡有上黨關、壺口關、石研關、天井關。牂牁郡有柱蒲關、進桑關。巴郡魚復有江關。都尉治燉煌郡，有陽關、玉門關。代郡有五原關。蒼梧郡有離水關、荔平關。合浦郡有合浦關。

（北宋）王欽若楊億等奉撰《冊府元龜》卷九百五十七《外臣部》：

黃支國，去合浦、日南三萬里。

（北宋）歐陽修《新唐書》卷三十一《天文志》：

自房陵、白帝而東，盡漢之南郡、江夏，東達廬江南郡，濱彭蠡之西，得長沙、武陵，又逾南紀，盡鬱林、合浦之地。

（南宋）鄭樵《通志》卷四十一《都邑略第一》：

黃支在合浦、日南之南三萬里。

（南宋）祝穆《方輿勝覽》卷三十九：

古越地，牽牛、婺女之分野，秦屬象郡，漢置合浦，郡即今州治也。吳時改珠官郡，復改合浦郡，宋置越州，隋煬帝改為祿州，又改為合州，又廢，為合浦郡。唐又為越州，又置珠池縣，改為廉州。

（南宋）潛說友《咸淳臨安志》卷十八《疆域三》：

前漢《天文志》：斗，江、湖。牽牛、婺女，揚州。又《地理志》：吳地斗分杼也，今之會稽、九江、丹陽、豫章、廬江、廣陵、六安、臨淮，盡吳分也。越地牽牛、婺女之分杼也，今之蒼梧、鬱林、合浦、交趾、九真、南海、日南，皆越分也。後漢《律歷志》注：蔡邕《月令章句》云：自斗六度至須女二度，謂之星紀之次，越之分杼。

（明）章潢《圖書編》卷四十一《廣東圖敘》：

廉州府，其名漢合浦，吳珠官，有瘴簡。其屬州一，縣三，附郭合浦二十六里，簡瘴外石康十里，欽州十里。簡無瘴，屬靈山三十里。簡其形勝大廉峙，東巨海南，鑿山為城門，其俗珠採，甲香為業，以臘月為歲首，以亥聚市，不事巫醫，儉朴簡訟。

夫粵自番州而上，接牂牁、九疑，此嶺南界也。其番夷市舶交易，蓋自唐結好立戶而已然矣。洪武初，命商番止集舶所，乃後稍稍築私室於灣澳，以便交易則已，有雜居之意矣。嘉靖間，盜發，禁之徙去，尋又別集。今之香山、濠鏡、澳林、林然聚也。夫市之，可也，居之，不可也，乃今則居矣，居而聯絡矣。又或匿亡命、畜死士矣，而漳潮無藉，蟻附而蠅集矣。官為之權，而任其便，而譁然齟齬，莫之誰何矣。今承平既久，國家威靈

萬無一失，脫有不測，何以待之。今成者即不可亟毀，廢者勿令其續成，又禁其來，不得附益。如洪武中，只就船所故事。數年之後，以次散落，是亦陰折其武悍之氣，而剝落其附比之黨也。或者其庶幾矣。不然吾見其寔以滋蔓，昌熾不可圖也。合浦、欽、靈山、雷，北海北界也。其俗類西粵，地境墉，不耕作，民以採珠為業，然自吾已有禁矣，唐宋間尋弛尋復，至洪武中猶復採取，已而禁嚴，民以饑困然。大盜巨艘掠而取之而不得，則攻埋椎剽，久而戍者私焉，陽浮而陰示。其意既乃半其入，則取沒而得者，掌握錐刀之末，抵死鉗鐵載道，亦可憫也。先是，烏兔、白鶴二寨面峙來而戍，已廢烏兔，而並於白鶴，益單弱，莫濟盜，公行無禁矣。議者欲復烏兔，嚴其戍而差其罪，劫殺為上，從者次之，沒而得者未減之。是亦救敝之微權乎，不然吾莫知其所終也。已瓊崖亦南溟之一都會也，則黎岐為急，盤據山峒，羣縣環乎其外，進有所掠而退有所守，彼無外憂而我有內患。蓋自職方以來，千六百年餘，靡有寧日。元至元間大舉空其巢窟，勒五指山，嘉靖間渡師直搗其穴賊，逆首就死，可謂偉矣，然皆未有善後之略，以故隨散隨聚，其舉之也，未覩目前一息之安，而調發傳置，儲芻之費不待遠計。瓊崖之間，固已數千萬矣，如此即累，舉何益也。議者欲于大兵之後乘其威力，從瓊至崖千里而遙，自儋至萬六百餘里，橫徑以十字通道，直走其峒洞胷達背，瓜分之，然后邑里亭障，衣冠禮樂。而沙灣羅合，即溫嶺脚諸峒悉為坦途，是亦一勞永逸之計。而瓊之民或者其少息也。自春、恩、陽、電而上，互高、涼、倉、梧，嶺西一都會也，其間猺浪最著，從晉康都城走高要、揚柳兩山之間，如大牛石歌村石龜古和種古蓬上馬，綿邈千餘里，皆為巢窟，往時劫高州，破其城嗣，復出沒莫禁蓋，我聚而彼散，我進而彼退，我厚集其陳，而彼星落以伺，吾釁近一舉蕩平為東安西寧，二都界兩山之間而統之，於羅定州燧亭障，為函夏經略。虜于是狼奔鳥腹遯，無復逸志，是誠千載一會也。但其招插安輯，愚以為園田漆林之類，宜悉以付也。勿與之競豪，而履畝之稅不必煩劇，新民復業者任之，其不能盡腿墾者，始令屯兵雜耕，加孔明渭濱之事。而又聚兵力營，保千百為屯，統以偏裨，勿令使分，即有流劫，相機鵬剿，數年之後，可以衽席而為樂土之民矣。

（明）張鳴鳳《桂勝》卷一：

清德之頌，蓋比孟嘗，珠去復還焉。以其時合浦隸桂部，其意則美，惜無所據。山後則桂城，東北雉堞交加，故西一面界在城中，東北有?亭遺址，亭詩與記并鐫山壁。又癸水光月兩亭，今廢題名，內有龍石，在木龍渡，去山里許，水中有石龍，狀可羣飲，其上巖門，又有試劍石，亦鑿空伏波為之者。

（明）張鳴鳳《桂勝》卷二：

雲崖二真書，旁有佛像，下鐫唐僧智深為合浦令呂興造佛像記。

(清) 朱鶴齡《禹貢長箋》卷五：

粵地，今之蒼梧、鬱林、合浦、交趾、九真、南海、日南，皆粵分。南海近海，多犀象、毒冒、珠璣、銀銅、果布之湊。番禺，其都會也。

(清) 杜臻《粵閩巡視紀略》卷一：

珠池，舊志云一稱珠母海，相傳有七，曰青鶯，曰斷望，曰楊梅，曰烏坭，曰白沙，曰平江，曰海渚，俱在冠頭嶺外，大海中，上下相去約一百八十三里。前巡撫陳大科曰，白沙、海渚二池，地圖不載，止楊梅等五池，又有對樂一池，在雷州，共六池。予訪之土人，楊梅池在白龍城之正南少西，即青鶯池。平江池在珠場寨前，烏坭池在冠頭嶺外，斷望池在永安所，珠出平江者為佳，烏坭為下，亦不知所謂白沙海渚二池也。《舊志》又載，有珠場守池巡司及烏兔凌祿等十七寨，而不著其所自，始白龍城亦不載于城池條，但言欽廉土不宜穀，民用採珠為生，自古以然。商賈齎米易珠，官司欲得者從商市之而已。漢順帝時桂陽太守文贛獻大珠，詔却之，足知其非常貢。至孫吳黃武間改合浦為珠官郡，始有官領採辦之事，然權非侈靡之主，史稱其時魏主來求雀頭香、明珠、翡翠、鬪鴨、長鳴鷄。權曰，彼所求者於我瓦石耳，悉以與之已，而魏使又來請以馬易珠璣、瑇瑁，權曰此皆孤所不用而可得馬，何苦而不聽其交易，由是多取以應之，其意蓋欲以權變弊敵國，如范蠡驕吳故事。然厲民已甚，難免作俑之譏矣。晉平吳，交州刺史陶璜請弛其禁，民困始蘇。自宋迄隋，未嘗復設。唐雖以珠池名縣，官不採取，但以利民。至偽漢劉鋹始設媚川都于海間鎮，募兵能採珠者二千人，以索繫石沒水而取之，深至五百尺，死者甚衆。

《水經注》：牢水出交州合浦郡。郡不產穀，多採珠寶，前政煩苛，珠從交趾，會稽孟伯周為守，有惠化，去珠復還，蓋珠池實有異。晉咸安間合浦人採珠得佛光燄，先是丹陽尹高悝行張侯橋浦，得金阿育王像，無跌座，與光燄經一歲臨海，漁人得跌座于海口，至是復得光燄，三相會合，宛然如一，蓋三十年矣。後有西域僧五人詣悝，言昔造像送鄴，遇亂埋河邊，不意乃在此，因拜伏流涕。是夕像放光，燭殿宇，土人云珠海嘗有光，有珠母老蚌也，偶入網中，其船必覆。

(清) 胡渭《禹貢錐指》卷六：

《地理志》以蒼梧、鬱林、合浦、交趾、九真、南海、日南為粵分者，是也。

(清) 張英等纂輯《御定淵鑿類函》卷三百三十五《州郡部二》：

合浦，《交州記》曰：合浦八十里，有圍洲，周迴百里。《漢書》曰：合浦郡，武帝元鼎六年開。

(清) 張英等纂輯《御定淵鑿類函》卷三百七十八《服飾部九》：

《交州記》曰：合浦圓州有石室，其裏一石如鼓形，見榴木杖倚著石壁，採珠人常致祭焉。

(清) 张英等纂辑《御定渊鉴类函》卷三百九十五《五穀部二》:

積糠成山，《潛夫論》云：不命大將以討叛羗，州郡興兵若排糠障風，淘沙壅河。《交州記》曰：合浦海口有糠頭山，傳云越王舂米於此，積糠而成。

(清) 傅澤洪《行水金鑒》卷八十八《運河水》:

太史公《自序》云：漢既平中國而佗能集揚、越以保南藩。賈誼《過秦論》云：南取百粵之地，以為桂林、象郡。鼂錯上書云：揚粵之地，少陰多陽，秦之戍卒不能其水土。嚴安上書云：秦使尉佗、屠睢將樓船之士南攻百越。此百越即揚越，秦時號陸梁地。《地理志》以蒼梧、鬱林、合浦、交阯、九真、南海、日南為粵分者，是也。

(清) 陳元龍《格致鏡原》卷六十一《穀類》:

《交州記》合浦海口有糠頭山，傳云越王舂米於此，積糠而成。

(清) 金鉞《廣西通志》卷四十五《古蹟二》:

馬門灘碑，在縣西南。唐咸通末，安南都護高駢平蠻獠，詔使歸闕，就海道由合浦經是，灘湍險石，伏舟不可行，因留俸錢，遺海門防遏使楊後營治之。乾符中工竣，立碑以紀。

(清) 阮元《廣東通志》卷四《疆域志》:

秦有五嶺之役，監祿鑿靈渠，通灘水，以臨西江。任囂城樂昌，以扼中江，而龍川處東江上游，以屬尉陀。遂倜然舉橫浦、湟谿、陽山三關，丸泥而封之。漢武帝畧定其地，置交阯部刺史，領諸郡，治蒼梧之廣信縣，因改南海為廣州，置刺史，分合浦以北屬之，而交阯以南為交州，治龍編。

(清) 阮元《廣東通志》卷六十四《雜事志》:

馬伏波運河舊道，合浦大洸港有潮，西通九河江口，有赤羊整蛋，人取蠔於此，又名赤蠔整。相傳漢馬援征交阯時，駐軍合浦，由外海運糧，恒苦烏雷風濤之險及海寇攘劫之患，遂以昏夜鑿白皮蜂腰之地，以通糧艘。此河通龍門七十二徑，直抵欽城，其掘鑿處約長七八里，闊五六丈，深三四尺。今兩頭潮水尚通，但中間堙塞。此水一開，實欽廉舟楫之利，明嘉靖知府張某欲鑿之不果。

(三) 風土物產

(西晉) 郭璞注(北宋) 邢昺等疏《爾雅注疏》卷十一《馬屬注》:

摩牛，注出巴中，重千斤。撮牛，注即犂牛也，領上肉撮肤起，高二尺許，狀如囊駝肉鞍一邊，健行者日三百餘里，今交州合浦徐聞縣出，此牛自駒駘已下雖從難駿異，毛色不同，皆馬之屬類，故以題之也下，倣此。

(东晋) 嵇含《南方草木状》卷上:

吉利草，其莖如金釵，股形類石斛，根類芍藥，交廣俚俗多畜蠱毒，惟此草解之，極驗。吳黃武中，江夏李侯以罪徙合浦，始入境，遇毒，其奴吉利者偶得是草，與侯服，遂解，吉利即遁去，不知所之，侯因此濟人，不知其數，遂以吉利為名，豈李侯者徒非其罪或侯自有隱德，神明啓吉利者救之耶？

(东晋) 嵇含《南方草木状》卷中:

益智子，如筆，毫長七八分，二月花色若蓮，著實五六月熟，味辛，雜五味中芬芳，亦可鹽曝，出交趾合浦。建安八年，交州刺史張津嘗以益智子粽餉魏武帝。

(东晋) 嵇含《南方草木状》卷中:

杉一名披粘，合浦東二百里，有杉一樹。漢安帝永初五年春，葉落，隨風飄入洛陽城。其葉大常杉數十倍，術士廉盛曰，合浦東杉葉也，此休徵當出王者。帝遣使驗之，信然，乃以千人伐樹，役夫多死者，其後三百人坐斷株上食，過足相容，至今猶存。

(东晋) 嵇含《南方草木状》卷中:

桂出合浦，生必以高山之巔，冬夏常青，其類自為林間，無雜樹，交趾置桂園。桂有三種，葉如柏葉皮赤者為丹桂，葉似柿葉者為菌桂，其葉似枇杷葉者為牡桂。《三輔黃圖》曰：甘泉宮南有昆明池，池中有靈波殿，以桂為柱，風來自香。

(南朝梁) 蕭子顯《南齐书》卷十四《志第六州郡上》:

越州鎮，臨漳郡，本合浦北界也。夷獠叢居，隱伏巖障，寇盜不賓，略無編戶。宋泰始中，西江督護陳伯紹獵北地，見二青牛驚走入草，使人逐之不得，乃誌其處，云“此地當有奇祥”。啟立為越州。七年始置百梁、隴蕪、永寧、安昌、富昌、南流六郡，割廣、交、朱、戴三郡屬。元徽二年，以伯紹為刺史，始立州鎮，穿山為城門，威服俚獠，土有瘴氣殺人，漢世交州刺史每暑月輒避處高，今交土調和，越瘴獨甚。刺史常事戎馬，唯以戰伐為務。……

合浦郡徐聞、合浦、朱盧、新安、晉始、蕩昌、朱豐、宋豐、宋广

(南朝梁) 蕭绎《金樓子》卷五《著書篇十》:

合浦有康頭山，山上有一頭鹿，額上戴科藤一枝，四條直上，各長丈許。

浣紗女死，三蛟至葬所。竇武母窆蛇擊柩前，羅含之雞能言，西周之犬解語，合浦桐葉飛至洛陽，始興鼓木奔至臨武。樂安胡氏案別卷引作市，枯骨吟嘯，遼水浮棺，有人言語，鬼來求助，張林使鬼而致富，神女為董永織縑而免災，懷德郡石解語，臨川間山能嘯，泗水却流，蓋泉赴節，蟲食葉成字，鵠口畫作書，狐屈指而作簿書，狸羣叫而講經傳。龜頭戴銀釵，猪脾帶金鈴，成臯之魚號慨，華陰之狗涕零。武昌郡閣杖有蓮華，長安城閣斧柯生葉，黃巾將走，草作鳥獸之形，董卓欲誅，葉為人馬之狀。有莘氏女採兒於空桑之中，

水濱浣嫗得子於流竹之裏。陸機引軍而牙折，桓元出遊而蓋飄，隕石於宋都雨，玉於薄邑取，董奉之杏去即值虎持歸，姜之橘還輒遇蛇，益陽金人以杖築地而成井水，竹王以劍擊石而出水，夫差之女死以玉壺送葬，韓重之女亡以金罌贈別，石言於晉國，石立於泰山，神降於莘，蛇鬪於鄭，子文受於菟之乳，魏顆獲結草之功，龍戰於夏庭，樹生於殷廟，會稽城門之鼓擊之聲聞洛陽，遂得號為雷門，是何怪於妖祥之事可殫言乎。

（北齊）賈思勰《齊民要術》卷十：

眊藤，生山中，大小如葦蒿蔓衍，生人採取剥之以作眊，然不多，出合浦。

（北齊）賈思勰《齊民要術》卷十：

簡子藤生緣樹木，正月二月華色，四月五月熟，實如梨，赤如雄雞冠，核如魚鱗，取生食之，淡泊無甘苦，出交趾、合浦。

（北齊）賈思勰《齊民要術》卷十：

桂，《廣志》曰：桂出合浦，其生必高山之嶺，冬夏常青，其類自為林，林間無雜。

（唐）歐陽詢《藝文類聚》卷八十四《寶玉部下》：

萬震《南州異物志》曰：合浦民善游採珠，兒年十餘歲，使教入水，官禁民採珠，巧盜者蹲水底，刮蚌得好珠，吞而出。

（唐）歐陽詢《藝文類聚》卷八十四《寶玉部下》：

謝承《後漢書》曰：孟嘗為合浦太守，郡境舊採珠以易米食。先時，二千石貪穢，使民採珠，積以自入，珠忽徙去，合浦無珠，餓死者盈路。孟嘗行化一年之間，去珠復還。又曰：汝南李敬為趙相，奴於鼠穴中得繫珠，瑠珉相連，以問主簿。對曰：前相夫人昔亡，三珠疑子婦竊之，因即去婦，敬乃送珠付前相，相慙。追去婦還。

（唐）歐陽詢《藝文類聚》卷八十六《藥部上》：

宋江夏王劉義恭啓曰：手勅猥賜華林櫻桃，為樹則多陰，百果則先熟，故種之於廳事之前。有蟬鳴焉，顧命黏取以弄。……梁庾肩吾謝蒙賚櫻啓曰：成叢殿側，猶連製賦之條，結實西園，非復粘蟬之樹，異合浦之歸來，疑藏朱實。同秦人之逐彈，似得金丸。

（唐）歐陽詢《藝文類聚》卷八十七《藥部下》：

《南方草木狀》曰：益智子，如筆，毫長七八分。二月華色，似蓮。着實五六月熟。味辛，雜五味中芬芳，亦可鹽曝，出交趾合浦。

（唐）歐陽詢《藝文類聚》卷八十九《木部中》：

《廣志》曰：桂出合浦，而生必於高山之巔，冬夏常青，其類自為林，間無雜樹。交趾置桂園。

劉欣期《交州記》曰：合浦東一百里有一杉樹，葉落隨風入洛陽城內。漢時善相者云：此休徵，當出王者。帝遣千人伐樹，役夫多死。三百人坐株上食，適足相容。

（唐）徐堅《初學記》卷八《州郡部》：

合浦。《交州記》曰：合浦八十里，有圍洲，周迴百里。《漢書》曰：合浦郡，武帝元鼎六年開。

（唐）杜佑《通典》卷一百八十八《邊防四南蠻下》：

黃支國，漢時通焉。合浦、日南之南三萬里，俗略與珠崖相類。自武帝以來皆獻見，有明珠、玉璧、琉璃、奇石、異物，大珠至圍二寸以下，而至圓者。置之平地，終日不停。

（唐）段成式《酉陽雜俎》前集卷十六《廣動植之一》：

《南康記》云：合浦有鹿，額上戴科藤一枝，四條直上，各一丈。犀之通天者必惡影，常飲濁水，當其溺時，人趕不復移，足角之理形似百物。或云：犀角通者是其病，然其理有倒插正插。腰鼓插倒者一半已下，通正者一半已上。通腰鼓者中斷不通，故波斯謂牙為白暗，犀為黑暗。成式門下醫人吳士臯常職於南海郡，見舶主說本國取犀，先於山路多植木，如狙棧。云犀前脚直常倚木而息，木欄折則不能起。犀牛一名奴角，有鳩處必有犀也，犀三毛一孔。劉孝標言犀墮角埋之，人以假角易之。

（唐）段公路《北戶錄》卷一《赤白吉了》

某年普寧有廉州民，獲赤、白吉了各一頭，獻於刺史者。其赤者尋卒，白者久而能言，凡笑語悉皆數人，斯珍禽也。吉了身黑背赤，首戴黃冠，善數人，笑言聲明，切於鸚鵡，好食雞子飯也。

（唐）王希明《太乙金鏡式經》卷八：

絳宮交州，按《禹貢》州之域，是為南越之土。秦始皇略定揚越以南，戍卒五十萬人守五嶺，自北徂南，入越之道必由嶺嶠，時有五處，故曰五嶺也，遂定南越，為桂林、南海、象等三郡，非三十六郡之限，乃置南海尉以典之。

合浦交趾新昌武寧九真 日南九德象林

（北宋）陶穀《清異錄》卷下《小摩尼數珠》：

漢隱帝之禍，手中猶持小摩尼數珠，凡一百八枚，蓋合浦珠也，郭允明刼去。

（北宋）李昉等奉勅撰《太平御覽》卷三百九十六《人事部三十七》：

萬震《南州異物志》曰：合浦之人習水善游，俛視增潭，如猿仰株，人如沉龜，出如輕鳧，蹲泥剖蚌，潛竊明珠。

（北宋）李昉等奉勅撰《太平御覽》卷七百一十八《服用二十》：

《西京雜記》曰：趙飛鸞為皇后，其女弟上遺合浦圓珠珥。《夢書》曰：珠珥為人子之所貴，夢得珠珥，得子也。

(北宋)李昉等奉勅撰《太平御覽》卷七百八十五《四夷部六》:

《漢書》曰:黃支國去合浦、日南三萬,國俗與朱崖略同。武帝時來貢具,多明珠、璧琉璃、奇石異物。大珠圍及二寸,至圍者。置之平地,終日不得止。
興古。

(北宋)李昉等奉勅撰《太平御覽》卷八百三《珍寶部三》:

興古。萬震《南州異物志》曰:合浦有民,善游採珠,兒年十餘,便教入水求珠,官禁民採珠,巧盜者蹲水底,剖蚌得好珠,吞之而出。裴氏《廣州記》曰:鯨鮪目即明月珠,故死不見有目精。

(北宋)李昉等奉勅撰《太平御覽》卷八百九十《獸部十》:

張勃《吳錄地理志》曰:合浦徐聞縣多牛,其項上有持骨,大如覆斗,日行三百里。

(北宋)李昉等奉勅撰《太平御覽》卷八百九十《獸部十二》:

又曰陶太尉微時,喪當葬,家貧親自營作塋,有一班牯牛載塋致,忽然失去,便自尋覓,忽於道中逢一老翁,問云君欲何所覓,太尉具荅,更舉手指,云向於山崗上,見一牛眠山圩中,必是君牛,此牛所眠處便好作墓安墳,當之致之極貴,小復不當,位極人臣,世為方嶽矣。又指一山云,此山亦好,但不如向耳,亦當世出刺史也,言訖便不復見。太尉墓之皆如其言。劉敬叔《異苑》曰:余以義熙十三年為長沙景王、驃騎參軍,在西州得一黃牛,時將貨之便,晝夜銜草不食,流淚瘦瘠。又曰即墨有古墓,或發之,有金牛塞,埏門不可移動,犯之則眊也。《異物志》曰:合浦牛如橐駝,案項上有特骨,大如覆斗,足捷疾,其行如馬,日行三百里。

(北宋)李昉等奉勅撰《太平御覽》卷八百九十六《獸部十八》:

《交州記》曰,合浦口有麕角,當額上載科藤,一株三四條,長可一尋,射師從禽,每見而不敢射。

(北宋)李昉等奉勅撰《太平御覽》卷九百二十《羽族部八》:

《南方草物狀》曰:番鳩生海邊土穴中,里民常以臘月正月捕食,味如蟹,得過十餘,不可復食。合浦、交趾、九真有之。

(北宋)李昉等奉勅撰《太平御覽》卷九百二十三《羽族部十一》:

《南方草物狀》曰:短頭細黃魚,以九月中因秋風而變成鶉。上圃吏民捕取,鹽炙食,滋味肥美,出交趾、合浦郡。

(北宋)李昉等奉勅撰《太平御覽》卷九百五十七《木部六》:

《廣志》曰:桂出合浦,而生必以高山之顛,冬夏常青,類自為林,間無雜樹。交趾置桂園。

(北宋)李昉等奉勅撰《太平御覽》卷九百五十七《木部六》:

劉欣期《交州記》曰:合浦東二百里有一杉樹,葉落隨風入洛陽城內,漢時善相者云:

此休徵，當出王者。故遣千人伐樹，役夫多死，三百人坐斷株上食，過足相容。

（北宋）李昉等奉勅撰《太平御覽》卷九百七十三《果部十》：

《南方草物狀》曰：益智中筆，毫長七八分，二月華，五月、六月熟，味辛中芬香，出交趾、合浦。

（北宋）李昉等奉勅撰《太平御覽》卷九百八十一《香部一》：

優殿。《南方草物狀》曰：合浦有菜，名優殿，以豆醬汁茹食，芳好，可食胡餅。

（北宋）李昉等奉勅撰《太平御覽》卷九百九十五《卉部二》：

《汝南先賢傳傳》曰：蔡順，字君仲，至孝。所居井桔槔歲久，欲易之，為在母年上，不敢。一旦忽生扶老藤遶之，有鳩巢其上。《金樓子》曰：合浦有康頭山，山有一頭鹿，額上載科藤一枚，四條直上，各長一丈許。

《南方草物狀》曰：沉藤生子大如壘歐，正月華苞，仍連著實，十月臘月熟。色赤生食之甜酢，生交趾、九真。事毗至藤，生山中，大如葦蒿蔓衍，居民採取剥之以作毗然不多，出興古、合浦。簡子藤生綠樹木，正月、二月華，四、五月熟。實如梨，赤如雄雞冠，核如魚鱗，取生食之味，淡泊無甘苦，出交趾、合浦。野聚藤綠樹木，二月華苞，仍連著實，五、六月熟，子大如羹歐，里民煮食，其味甜酢，出蒼梧。科藤，生金封山，烏潯人往往賣之，其色正赤，又云以草染之，出興古。

（北宋）唐慎微《證類本草》卷八：

優殿，味辛溫，去惡氣，溫中消食，生安南。人種為茹。《南方草木狀》曰：合浦有優殿，人種之，以豆醬汁食，芳香好味。

（南宋）鄭樵《通志》卷七十五《昆蟲草木略第一》：

優殿。《南方草木狀》曰：合浦人種之，用醬汁而食，芳香。

（南宋）鄭樵《通志》卷七十六《昆蟲草木略第二》：

牛之屬多，《爾雅》曰：摩牛、爆牛、擺牛、犛牛、犛牛、犛牛、犛牛，摩音麻，郭云出巴中，重千觔，爆音電，郭云即犛牛也，領上肉爆肤起，高二尺許，如橐駝，肉鞍一邊，犛者日行三百里，交州、合浦、徐聞縣出此牛。

（南宋）鄭樵《通志》卷一百九十八《四夷傳第五南蠻下》：

黃支，漢時通焉，在合浦、日南之南三萬里。其俗畧與珠崖相類。自武帝以來常獻見，有明珠玉璧、琉璃，奇石異物。大珠至圍二寸以下，而最圓者，置之平地，終日不停。

（南宋）張鎡《仕學規範》卷六：

國子博士毛應佺知賓州郡，在合浦之東千里，而近地多珠、貝、犀、象、沉檀之產。前之剖符者往往舳舻相銜尾，竭其土物，公北歸之日，盡室一舟，無錙銖南國之貨。

(南宋) 罗愿《尔雅翼》卷十一《桂》:

《廣志》曰: 桂出合浦, 而生必於高山之巔, 冬夏常青。

(南宋) 王应麟《通鑑地理志通釋》卷五《十道山川攷》:

漢交趾、九真、日南、合浦皆有蠻。唐嶺南諸蠻州九十二, 隸桂邕州, 安南府。蜀蠻蠻州十八, 隸鷲州。

(南宋) 佚名《錦繡萬花谷》后集卷四十:

背上有甲珠文, 劉欣期《交州記》曰: 鮫魚出合浦, 長三尺, 背上有甲珠文, 堅強可以飾刀口, 又可以鑪物。

(元) 馬端臨《文獻通考》卷三百二十八《四裔考五》:

南平蠻。

南平蠻東距智州, 南屬渝州, 西接南州, 北治州, 戶四千餘, 多瘴癘, 山有毒草、沙虱、蝮蛇。人樓居, 梯而上, 名為千欄。婦人橫布二幅穿中貫其首, 號曰通。美髮髻垂於後, 竹筒三寸斜穿其耳, 貴者飾以珠璫。俗女多男少。婦人任役婚法, 女先以貨求男, 貧者無以嫁, 則賣為婢。男子左衽露髮徒跣, 其王姓朱氏, 號劔荔王。唐貞觀三年遣使內款, 以其地隸渝州, 又有甯氏, 世為南平渠帥, 陳末以其帥猛力為寧越太守, 陳亡, 自以為與陳叔寶同日而生, 當代為天子, 乃不入朝。隋兵阻瘴不能進, 猛力死, 子長真襲刺史, 及討林邑, 長真出兵攻其後, 又率部落從征遼東。煬帝授官遣還, 又以其族人甯宣為合浦太守, 隋亂, 皆以其地附蕭銑。

(明) 楊慎《丹鉛總錄》卷四《花木類》:

合浦葉

劉欣期《交州記》云: 合浦東百里有一杉樹, 葉落隨風入洛陽城內。漢時有善相者, 說此休徵當出王者, 特遣人伐樹。庾信詩, 傳聞合浦葉, 遠向洛陽飛。吳均詩, 三秋合浦葉, 九月洞庭枝。薛道衡《吳趨行》杉葉朝飛向京洛, 文魚夜過歷吳洲。皇甫冉詩, 心隨合浦葉, 命寄首陽薇。楊盈川文, 合浦杉葉飛向洛陽, 始興鼓木。見《水經注》。

(明) 徐元太《喻林》卷一百十八《物宜門三》:

桂出合浦, 生必以高山之巔, 冬夏常青, 其類自為林, 間無雜樹。《南方草木狀》

(明) 彭大翼《山堂肆考》卷二十九《地理》:

錦官

錦官城在成都府萬里橋南, 因蜀有錦官故名, 猶合浦之有珠官也。

(明) 陳耀文《天中記》卷四十六：

優殿，合浦有菜名優殿，以豆醬汁茹食之，甚香美可食。

(明) 陳耀文《天中記》卷四十九：

合浦圓珠，趙飛鸞為皇后，其女弟上遺合浦圓珠珥選一。卞太后唯約儉，不尚華麗，無文繡珠玉，器皆黑漆。太祖嘗得名璫數具，命后自選一具，后取其中者，太祖問其故，封曰，取其上者為貧，取其下者為詐，故取其中者。

(明) 陳耀文《天中記》卷五十一：

休徵合浦東二百里，有一杉樹，葉落含風入洛陽城內，漢時善相者云，此休徵，當出王者，故遣千人伐樹，役夫多死，三百人坐斷株上食，過足相容。

(明) 陳耀文《天中記》卷五十三：

吉利草，其莖如金釵，股形類石斛，根類芍藥，交廣俚俗多蓄，蠱毒惟此草解之，極驗。吳黃武中，江夏李侯以罪徙合浦，始入境遇毒，其奴吉利者偶得是草，與俱服，遂解，吉利即遁去不知所之。侯因此濟人，不知其數，遂以吉利為名。《草木狀》

(明) 陳耀文《天中記》卷五十五：

合浦，合浦牛如橐駝，案頂上有特骨，大如覆斗，足健，疾其行一日常數百里。《異物志》引，牧牛項上惟肉大如斗，出徐門，餘同《初學記》。

(明) 陳耀文《天中記》卷五十九：

蛙變，至道二年夏秋間，京師鶩鶩者積於市門，皆以大車載而入。鶩纔直二文。是時雨水絕，無蛙聲，人有得於水，次者半為鶩半為蛙。《列子》云：蛙變為鶩。注云事見《列子》，事不謬矣。《談苑》短頭細黃魚，以九月中因秋風而變成鶩，官吏捕取以鹽炙食，滋味肥美，出交趾合浦郡，《草木狀》欺孺子，夫俗士之牽達人也，猶鶩鳥之欺孺子也，鶩鳥之性善近人，飛不峻也，不速也，蹲蹲然似若將可獲也。卒至乎不可獲，是孺子之所以踟蹰跣足而不以為敝也，俗士之與達人言也，若將可寤，卒至乎，不可寤，是達人之所以乾唇噎聲而不舍也。《中論》

(明) 章潢《圖書編》卷八十九：

珍珠，合浦蠻人取之。

大蜈蚣皮，合浦、徐聞可胃鼓，或云捕蛇。

(明) 盧之頤《本草乘雅半偈》卷二《本經上品三》：

覈曰：牡桂出合浦、交趾、廣州、象州、湘州，桂嶺諸處生，必高山之巔，旁無雜樹，自為林類。葉色常青，凌冬不凋，如枇杷葉，邊有鋸齒，表裏俱有白毛，中心有縱文兩道，宛如圭形。

(明) 盧之頤《本草乘雅半偈》卷八：

覈曰：《禹貢》淮夷蠙珠。後世乃出，南北海川、蜀西路女、瓜河、北澹、灤江、南湖、泖閘，亦時有之。《嶺表錄異》云：廉州，邊海中有洲島，島上有大池，池水淡潔，謂之珠池。每歲刺史親監珠戶入池，採老蚌，剝珠以充貢。《廉州志》云：合浦縣海中有梅、青、嬰三池，蜃人每以長繩繫腰，攜籃入水。拾珠母納其中，即振繩，令舟人急起之。設有線血浮水上，其人即葬魚腹矣。

(清) 胡世安《異魚圖讚箋》卷二：

任昉《述異記》虎魚老者為鮫，《雜俎》魚二百斤為鮫，《南山經》禱過山浪水出焉，中有虎鮫，其狀魚身而蛇尾，其音如鴛鴦，食之不腫，可以已痔。中山經荆山漳水出焉，東南注于睢，多鮫魚皮，有珠文而堅，可飾刀劍，尾有毒。到歆期《交州記》鮫海魚出合浦，長三丈狀，似鼉而無足，背上有甲珠文，堅強可飾刀劍，又可以鑿物。按左思賦，鳧帶鮫函。則亦可飾甲矣，韓景昇云，圓廣尺飾，尾亦長尺許，背面粗錯。李時珍云，古曰鮫，今曰沙，是一類而有數種，形並似魚，青目赤頰，背上有鬣鬣，下有翅，味並肥美，南人珍之，大者尾長數尺，能傷人，皮皆有沙，如真珠斑，其背有珠文，如鹿，而堅疆者曰鹿沙，亦曰白沙，云能變鹿，背有斑文如虎而堅疆者曰虎沙，亦曰胡沙，云虎魚所化，鼻前有骨如斧斤，能擊物壞舟者曰鋸沙，又曰挺額魚，亦曰鱠。

(明) 方以智《通雅》卷四十三：

侵牡桂，非木犀之桂也。《爾雅》木桂，葉似枇杷而大。嵇含曰：桂出合浦，冬夏常青，自為林，交趾置桂園。有三種，葉如柏皮赤者為丹桂，似柿葉者為茵桂，葉似枇杷者為牡桂。智以此木桂即牡桂。

(清) 張英等編纂《御定淵鑿類函》卷三百九十七《藥部二》：

原《廣志》曰：益智葉似蕞荷，長丈餘，其根有小枝，高者八九寸，無葉萼，其子叢生著之，大如棗，中瓣黑皮白核，小者曰益智。之攝涎澁，出萬壽，亦生交趾。《南方草木狀》曰：益智子，如筆毫，長七八分，二月華色似蓮，著實五、六月熟，味辛，雜五味中芬芳，亦可鹽曝，出交趾、合浦。

(清) 張英等纂輯《御定淵鑿類函》卷四百二《果部四》：

原啓梁庾肩吾《謝蒙賚朱櫻》啓曰：成叢殿側，猶連製賦之條，結實西園，非復黏蟬之樹，異合浦之歸來，疑藏朱實，同秦人之逐彈，似得金丸。

(清) 張英等纂輯《御定淵鑿類函》卷四百八《草部一》：

《草木狀》曰：吳黃武中，夏江李侯以罪徙合浦，遇毒其奴吉利者得一草，莖如金釵，股類石斛，根類芍藥，與侯服，遂解，吉利即遁去，不知所之。侯因此濟人，不知其數，

遂名吉利草。

(清)张英等编纂《御定渊鉴类函》卷四百十六《木部五》:

《说文》曰:桂江南木,百药之长。《广志》曰:桂出合浦,而生必於高山之巔冬夏常青,其類自為林,間無雜樹。

(清)张英等纂辑《御定渊鉴类函》卷四百三十五《獸部七》:

角若擔矛。《異物志》曰:合浦牛如橐駝,案頂上有特骨,大如覆斗,足健,疾其行百里。《鬱林物志》曰:州留者,其實水牛,蒼毛豕身,角若擔矛,護衛其犢,與虎為讐。

(清)张英等纂辑《御定渊鉴类函》卷四百四十二《鱗介部六》:

毒尾。劉欣期《交州記》鮫魚出合浦,長三尺,背上有甲珠文,堅強可以飾刀口,又可以鑿物。《山海經》燕山漳水出焉,其中多鮫魚。注曰:鮫有珠文,尾青,毒皮可以飾刀劍口。

(清)张玉书编纂《御制佩文韻府》卷十八之二:

南海鮫。《爾雅翼》,出狀如鱉而無足,圓廣尺餘,尾長尺許,皮有珠文而堅剛,可以飾物。又《雲仙雜記》,凡鼓以海鮫皮為之,泥以象骨,則雄而清,用雜皮則濁。元稹詩,曬篆看沙鳥,磨刀綻海鮫。

合浦鮫。《異物志》,朱厓有水蛇,鮫魚出合浦,長二三尺,背上有甲珠文,堅強可以飾刀,可以為鑿。

(清)张玉书编纂《御制佩文韻府》卷三十:

合浦杉。《交州記》,東有一葉落,隨風入洛陽城內。漢時有善相者,云此休徵也。

(清)陳元龍《格致鏡原》卷三十二《鳥類三》:

《述異記》,南海有珠,即鯨目瞳,夜可以鑿,謂之夜光。凡珠有龍珠,龍所吐也,蛇珠,蛇所吐也。南海俗云蛇珠千枚不及一玫瑰,言蛇珠賤也。越人俗云,種千畝木奴,不如一龍珠。吳越間俗說明珠一斛貴如王者,合浦有珠市。

(清)陳元龍《格致鏡原》卷三十二《鳥類三》:

萬震《南州異物志》,合浦民善游採珠,兒年十餘便教人水,官禁民採珠,巧盜者蹲水底,剖蚌得好珠,吞而出。

(清)陳元龍《格致鏡原》卷六十二《蔬類一》:

《晉書》吳天紀三年,建鄴有鬼目菜,于工黃狗家生,依緣棗樹,長丈餘,莖廣四寸,厚二分。又有莧菜,生工吳平家,高四尺如枇杷形,上圓,徑一尺八寸,莖廣五寸,兩邊生葉,綠色。《草木狀》合浦有菜,名優殿,以莖醬茹食之,甚香美。

(清)陳元龍《格致鏡原》卷六十三《蔬類二》:

《吳都賦》苞筍抽節,劉淵林註,苞筍,冬筍也,出合浦,其味美於春夏時筍。

（清）陳元龍《格致鏡原》卷六十五《木類二》：

劉欣期《交州記》，合浦東百里有一杉樹，漢安帝永初五年春，葉落隨飄入洛陽城，其葉大常杉數十倍，術士盛廉曰，合浦東杉葉也，此休徵，當出王者。帝遣千人伐樹，役夫多死者。

（清）陳元龍《格致鏡原》卷六十九《草類二》：

《南方草木狀》，吉利草，莖如金釵，股形類石斛，根類芍藥，交廣里俗多畜蠱毒，惟此草解之。吳黃武中，江夏李侯以罪徙合浦，初入境遇毒，其奴名吉利者偶得是草，與侯服，遂解，因以吉利為名。又良耀草，枝葉如麻黃，花白如牛李，秋結子如小粟，煨食之解毒，功不亞於吉利。始有梁耀者得，是草因亦以為名，梁轉為良耳，出高涼。

（清）陳元龍《格致鏡原》卷六十九《草類二》：

《藝文類聚》野聚藤綠樹木，二月花色，仍連著實，五、六月熟，大如羹甌，其味甜酢，出蒼梧。蘭子藤生綠樹木，正二月花青色，四、五月熟，實如梨赤，如雄雞冠，生食之味淡泊，出交趾、合浦。菽藤生金封山，俚人往往賣之，其色正赤，出興古。浮沉藤生子，大如壺甌，正月花色，仍連著實，十月臘月熟，色赤，生食之甜酢，出交趾、九真。

（清）陳元龍《格致鏡原》卷七十九《鳥類三》：

《草木狀》短頭細黃魚，以九月中因秋風而變成鶉。圃吏捕取，以鹽炙食，滋味肥美，出交趾、合浦郡。

（清）陳元龍《格致鏡原》卷九十二《水族類三》：

《交州記》鮫魚出合浦，長三尺，背上有甲珠文，堅強可以飾刀口，又可以鑿物。

（清）陳大章《詩傳名物集覽》卷六《鱗介》：

劉歆期《交州記》曰：鮫魚出合浦，長三尺，背上有甲。

（清）徐文靖《管城碩記》卷十四：

雜申椒與菌桂。《集注》曰：菌渠隕反，或从竹椒木實之香者，申或地名，或其美名耳，桂木名，本草云，花白葉黃，正圓如竹。按嵇含《草木狀》曰：桂出合浦，冬夏常青，交趾置園。有三種葉，如栢皮赤者為丹桂，似柿葉者為菌桂，葉似枇杷者為牡桂。則菌桂乃桂之一種耳。張氏《文選纂注》曰菌薰也，即零陵香也，謬甚。

（清）徐文靖《管城碩記》卷二十六：

《吳都賦》山雞歸飛而來棲。纂注云：山雞如雞，而黑色樹棲，晨鳴，非蟻也，合浦有之。

（清）金鉞《廣西通志》卷二十八《權稅》：

晉武帝泰始末，交州牧陶璜上言，以合浦郡土地磽确，無有田農，百姓唯以採珠為業，商賈去來以珠買米，而吳時珠禁甚嚴，慮百姓私放好珠，禁絕去來，人以饑困，又所調猥

多，限每不充，今請上珠三分輸二，次者輸一，麤者蠲除，自十月訖二月，非採上珠之時，聽商旅往來，詔並從之。

（清）嵇璜等撰《欽定續通志》卷一百七十四《昆蟲草木畧》：

吉利草因人得名，嵇含《南方草木狀》云，此草生交廣，莖如金釵，股形類石斛，根類芍藥。吳黃武中，江夏李侯徙合浦遇毒，其奴吉利偶得此草，與服遂解，而吉利遂遁去，侯以此濟人，不知其數也。

（清）魏之琇《續名醫類案》卷二十九《蠱》：

吉利草類石斛，根類芍藥，吳黃武中，李侯以罪從合浦，入境遇蠱，其奴吉利取此草解之，遂以為名，即前之吉財也。

（清）阿桂等撰《欽定滿洲源流考》卷十九《國俗四》：

東珠出混同江，及烏拉、寧古塔諸河中，勻圓營白，大可半寸，小者亦如菽顆。王公等冠頂飾之，以多少分等秩，昭寶貴焉。出蚌陰精稱自古，大東毓瑞未前聞。混同鴨綠圓流夥，合浦交州獨產分。取自珠軒供賦役，殊他蠶戶劾殷勤。緯蕭亦識留名喻，沽譽難更舊制云。

（清）阿桂等修《欽定盛京通志》卷十五：

東珠

東珠出混同江，及烏拉、寧古塔諸河中，勻圓營白，大可半寸，小者亦如菽顆。王公等冠頂飾之，以多少分等秩，昭寶貴焉。出蚌陰精稱自古，大東毓瑞未前聞。混同鴨綠圓流夥，合浦交州獨產分。取自珠軒供賦役，殊他蠶戶劾殷勤。緯蕭亦識留名喻，沽譽難更舊制云。

（清）阮元《廣東通志》卷五十一《風俗》：

廉州府，合浦郡土地磽确，無有田農，百姓以采珠為業，商賈往來以珠貨米。吳時珠禁甚嚴，慮百姓私散好珠，禁來去，人以饑困。

（清）阮元《廣東通志》卷五十二《物產》：

吉利草，其莖如金釵，股形類石斛，根類芍藥，交廣俗多蓄蠱毒，惟此草解之極驗。吳黃武中，江夏李侯以罪徙合浦初入境遇毒，其奴吉利偶得是草，與侯服，遂解，侯因此濟人，遂以吉利為名。

益智子，如筆毫，長七八分，二月花色，若蓮，著實五六月熟，味辛，雜五味中芬香，亦可鹽曝，出交趾、合浦。

桂出合浦，生必以高山之巔，冬夏常青，其類自為林間，無雜樹。交趾置桂園，桂有三種，葉如栢葉，赤皮者為丹桂，葉似柿葉者為菌桂，其葉似枇杷葉赤為牡桂。

合浦澗子藤生緣樹木，正二月花，四五月熟，實如梨赤，如雄雞冠，取生食之，味淡泊，出交阯。

合浦有鹿，額上戴科藤一枝四條，直上各一丈。儋耳珠厓郡山多麋麋。

爆牛即犂牛也，領上肉爆肤起，高二尺許，狀如橐駝肉鞍一邊，健行者，日三百餘里，今交州、合浦、徐聞縣出此牛。

鮫魚出合浦，長三丈，背上有甲珠文，堅強，尾長三四尺，皮可以飾刀劍，又可以鑿物。

合浦民善游採珠，兒年十餘歲便教入水，得好珠吞而出。

合浦有珠市，粵俗以珠為上寶，生女謂之珠娘，生男謂之珠兒。

珠出合浦海中，有珠池，蜃戶投水採蚌取之，歲有豐耗，多得謂之珠熟。相傳海底有處所如城郭，大蚌居其中，有怪物守之不可近，蚌之細碎蔓延於外者，始得而采。

（清）阮元《廣東通志》卷六十四《鐵鼓》：

韶州盧忠惠祠有鐵鼓一面，微損，擊之有聲。先時江中有一蛟，舟行者多為害，光稠以鐵為鼓及船，使役人乘之，一日夜來往五羊，得蛟斬之，至今蛟骨二段存祠中。蓋以鐵物治蛟，乃金尅木之道，龍性畏鐵，蛟亦然，是皆屬木故，以金制之，伏波鑄鐵船沉於合浦，其亦以鎮壓毒蛟而已